



大明度無極經

吳月支優婆塞支謙譯



清刻龍藏佛說法變相圖

大明度無極經卷第一 第二同卷

潛六

吳月支優婆塞支謙譯

上行品第一

聞如是一時佛遊於王舍國其雞山與大比丘衆不可計弟子善業第一及大衆菩薩無央數敬首爲上首是時十五齋日月滿佛請賢者善業此衆菩薩集會樂汝說菩薩大士明度無極欲行大道當由此始於是鷲鷲子念此賢者說明度道自己力耶乘佛聖恩乎善業知其意而答曰敢佛弟子所說皆乘如來大士之作所以者何從佛說法故有法學賢者子賢者女得法意以爲證其爲證者所說所誨所言一切如法無諍所以者何如來說法爲斯樂者族姓子傳相教如經意無所諍善業言如世尊教樂說菩薩明度無極欲

行大道當由此始夫體道爲菩薩是空虛也斯道爲菩薩亦空虛也何等法貌爲菩薩者不見佛法有法爲菩薩也吾於斯道無見無得其如菩薩不可見明度無極亦不可見彼不可見何有菩薩當說明度無極若如是說菩薩意志不移不捨不驚不憚不以恐受不疲不息不惡難此微妙明度與之相應而以發行則是可謂隨教者也又菩薩大士行明度無極當學受此如受此者不當念是我知道意所以者何是意非意淨意光明賢者驚鷺子曰云何有是意而意非意善業曰若非意者爲有爲無彼可得耶曰不可也善業曰如非意有與無不可得不可明其合此相應者豈有是意意非意哉曰如是何者謂非意善業曰謂其無爲無雜念也驚鷺子曰善哉

善哉佛稱賢者說山澤行實爲第一菩薩受此無上正真之道其不退轉觀而不休明度無極當以知此欲學弟子地當聞是經擇取奉持欲學緣一覺地若學佛地當聞是經擇取奉持所以者何是明度道說法甚廣是爲菩薩大士所學善業白佛言吾以爲菩薩者其不可見名亦不可得又所匡政皆不可見不可得者當何爲菩薩說法如是世尊所疑有著吾與物也斯不可得貨貨費耗皆非有得但以名爲菩薩至于佛亦名也然不住非不住所以者何名不可得是故名者非住非不住若爲菩薩說深明度意不移不捨不疲不息不有惡難不驚不憚不以恐受以體解而性入是爲住不退轉應於無處當以知此又妙世尊菩薩修行明度無極不以色住於

痛想行不以識住所以者何若止於色爲造色行止痛想行爲造識非爲應受明度無極不以造行爲應受受此其不具足明度無極終不得一切知驚驚子曰菩薩何行而受明度善業曰以不取色不取痛想行識所以者

何色無彼受痛想行識無有彼受若此色無彼受爲非色痛想行識無有彼受爲非識明度之道無有彼受所以者何吾受如影取無所得是爲明度無極之行也是名曰菩薩大士諸法無受之定場廣趣大而無有量一切

潛六

弟子諸緣一覺所不能持也又一切知亦無彼受所以者何無想見故若想見者終不得此爲若異學先泥之信不得一切知彼先泥信解道學度入慧亦不取色不取痛想行識不從色見慧不內色見慧不外色見慧不內

外色見慧不以異色見慧於痛想行如上說不從識不以內外異識見慧如是究暢從信解得道地法意作量以爲脫便無受無所獲已受解得滅度明度不爲智想如是世尊雖菩薩於是道不取色痛想行識亦不中道滅度而具如來十力四無所畏佛十八不絕之法也又菩薩大士行明度無極當以觀此何等是智慧何所爲明度何以明諸法無所從得是故謂之明度無極如是觀省察思惟不驚不憚不移不疲如是菩薩爲不中休明度無極當以知此驚驚子曰何故菩薩知己休止爲知於色休色本性於痛想行休識本性於痛想行休識本性明度無極休智本性善業曰如是賢者其於色也休色自然於痛想行休識自然明度無極休識自然明度無極

休智自然行此道者於智休止智之自然者
休矣想休止相之自然者休矣鷲鷲子曰善
哉善哉其學此者必出一切知善業曰然菩
薩學此出一切知所以者何其於諸法無出
無生如是學故速得佛坐又妙賢者菩薩履
行明度無極若行色爲想行若行色占爲想
行若行色不占爲想行若行色興爲想行若
行色敗爲想行若行色滅爲想行若行色思
爲想行若行色空爲想行若行色非身爲想
行痛想行識如上說皆爲想行若識有是吾
當行欲得行設有如是行如是惟爲惟行此
道是菩薩大士爲行得想之行無善權方便
以爲休於明度無極鷲鷲子曰菩薩何行爲
無想無得行有善權方便而不休於明度無
極答曰不行色不行色占不行色興不行色

潛六

四

敗不行色滅不行色想不行色空不行色非
身痛想行識如上說不識有是吾當得行是
行不有是如此行如此惟爲惟行此道如是
行菩薩大士爲無想無得行爲有善權方便
而不休於明度無極又菩薩大士行明度無
極於此不近爲不行不近行不行不近亦不
行斯不否行斯不近行斯不近不行斯亦不
近於行不行於不近不行於不行不否行於
不近鷲鷲子曰何故不近善業曰如諸法無
所近無從度是名菩薩大士一切諸法無度
之定場曠超大而無有量一切弟子諸緣一
覺所不能持行斯定者疾得無上正真之道
爲無不覺乘佛聖旨善業曰是菩薩大士受
拜於往昔如來至真等正佛者乃行斯定彼
受無見無見爲定其於定者不知吾受定吾

已定吾依定也彼於是中一切不明驚鷺子曰云何菩薩爲昔如來所記拜當得佛者彼能見定是定者乎答曰不也所以者何如彼族姓子行明度無極者爲非不想所以者何無所明故是以定者非想非不想佛言善哉善哉善業說山澤行爲第一辯菩薩大士當以學此如此爲學明度無極驚鷺子曰佛以如此學學智慧道者是爲學何法佛言如此學者是菩薩爲無所法學何以故是法不有知明如凡愚人專著者也曰當何用明知此法佛言當如不明無所明知明之謂也凡愚人以專著欲明故爲不明由不明礙兩際不知不見不明諦法而欲於法從法思欲專著名色以專著故而不知此無所用聰明之法已不知見亦不思惟不觀不省故墮愚數便

無有信不解不用是故謂之凡愚專著驚鷺子曰計如此學菩薩大士不學一切智佛言然如此學不學一切智如是曉了乃爲學一切智能出一切法善業白言如世尊言是爲幻人學一切智已學一切智乃出諸法如是直言之當云何佛言吾因是以問汝所安便說對曰甚善佛言云何幻與色異乎不也世尊幻與痛想行識爲有異乎不也世尊色猶幻痛想行識猶爲幻云何善業明是中想知立行五陰而爲菩薩對曰菩薩學如幻人是中持如幻者即五陰所以者何如佛說識如幻若此識六根亦然何者意幻爲三界耳如三界即六根如六根即五陰驚鷺子言菩薩聞是得無懈怠佛言設爲惡友所制必將懈怠若得善友終不懈也善業白佛何以知菩

薩惡友佛言其不慕樂明度無極欲棄捨若形想愚占文飾違此深智更說經道當知是爲菩薩惡友曰何是菩薩善友佛言未起明度無極者即勸使學而教誨之令入斯道爲現邪行說邪之害是邪行是邪害使遠離此當知是爲菩薩大士弘誓之鎧善友者也又問呼道人爲菩薩其句義爲奈何佛言所謂菩薩者一切諸法學無罣礙已學無礙能出諸法故謂菩薩大士者其義云何佛言大士者能聚大眾爲之舍家是故爲大士也鷲鷲子曰吾亦樂其爲大士者於見身見性見命見人見丈夫見有見無見斷滅見常在爲斷大見何者爲說上法度諸見淵是故爲大士善業曰夫大士者如一切知意無齊同志於弟子緣一覺在彼無著所以者何悉知意質

直無漏無受無滅以悉知意大照菩薩是故爲大士鷲鷲子問何故菩薩大士亦彼悉知而意不著善業曰以無意故於彼悉知而無所著賢者滿慈子言吾亦樂其爲大士者揖人昇於大乘而有弘誓之鎧是故爲大士善業白佛何謂弘誓之鎧佛言菩薩東已自誓吾當滅度無央數人已度無量無數人民皆得泥洹知其無法得滅度也所以者何法意如是譬若幻師與幻弟子於四衢道化作人衆以爲化人而斬其首汝知云何彼有所殺有死者乎不也世尊如是善業度無數人爲無有人得滅度也菩薩聞是不驚不憚不以恐受不移不捨不疲而無慘悴是爲有弘誓鎧能昇大乘當以知此滿慈子曰吾省佛言如我所得當知是義爲無帶甲所以者何如

佛告善業無造佛一切法無作成諸法者亦無造衆生者如是義者無弘誓鎧善業曰無所束帶菩薩大士爲無弘誓所以者何色痛想行識不著不縛不解故驚鷺子曰何如爲色痛想行識而云不著不縛不解善業曰色如幻人故不著不縛不解痛想行識爲如幻人不著不縛不解無有之色不著不縛不解無有之痛想行識不著不縛不解五陰如是諸法亦是故菩薩所爲誓者無有誓也善業問焉知菩薩正昇大乘何謂大乘何乘發往孰速大乘斯乘何出佛言大乘之爲乘者爲無量乘爲衆生之無量所以者何人種無量菩薩爲之生大悲意以斯大乘往湊三界聖一切知乃建大乘乘無從出所以者何有生有出則爲二法若不起不致於諸法不得

者是爲無所生無從出善業曰大哉斯乘爲天人質諒王諸世間出世善業乘與空等弘裕若虛空苞容衆生無有量數恒以虛閑濟人無極而爲徧宣故爲大乘不見其反亦不見出如此乘者不從始得不從終得亦不中得於三塗等故爲大乘佛言如是善業以能行此乘故謂之菩薩大士驚鷺子曰佛請賢者說明度無極而道大乘者有檀知耶善業白佛吾說明度無極得無過乎佛言不也適得其中善業言菩薩大士不於始近不於終近亦不中近色無際道無際痛想行識道俱無際是故菩薩無近無得無知無明色菩薩不知不明不致不得痛想行識亦如是都一切於一切無知無明無致無得當爲何菩薩說明度無極尚不見菩薩何用見明度無極

菩薩者但名耳猶我無可專著我者空虛不可審明我不可明道何可知如是諸法無有專著何等爲色色無生無牢固何等爲痛想行識識無生無牢固諸法無生無有牢固彼無專固者不是法不非了無本主當爲誰說是處無知亦無異處可得菩薩行道也如是世尊其聞是言不驚不但不捨不疲不有慘悴如此知行是菩薩爲能惟明度無極所以者何行此經時以如是法熟觀斯道是時爲不近色不近色者不見滅也所以者何於自

潛六

九

識是我即由是爲我識彼爲造計者也鷲鷯子曰吾省是語於義菩薩爲無所起若無起者何故菩薩行艱難行爲衆生更苦無量善業曰吾不樂菩薩艱難行而大士者無艱難想以行道也所以者何行艱難苦想者不能爲無量人民建大利也是以當爲安隱易行之想爲衆生建若母想父想昆弟想姊妹想子想女想當生是想行菩薩道於一切人爲已親想以是想將導之見衆生爲若已都一切於身不明是外內爲生法想斯一切爲吾子吾當度此無量苦惱不有怒意若被形截心無鬱毒終不爲苦想也如賢者言菩薩無起以其無起故爲菩薩鷲鷯子曰云何菩薩而無起者於道人法於一切知一切知一切知法亦將無起善業曰然於佛法都無所起

問曰在佛法而無起者其於凡人及凡人法亦將無起答曰然於凡人法亦無所起鷲鷲子曰如是菩薩於道人法從一切知至凡人法皆無起者是爲不近不起得一切知耶善業曰不起之法無欲得要也不起之念亦非有法可擇取也有得佛者我以爲諍曰是如何當從未生法擇已生法擇乎生死法至生法至乎答曰云何生法不生而不生法生耶鷲鷲子曰不生法者不起法也樂不起法語耶樂起語也如賢者樂以樂不起之不要善業曰如是當樂不起不要賢者所樂吾亦樂說鷲鷲子曰如善業語爲法都講最不可及所以者何在所問如應答法意不搖其言皆妙答曰是法意也佛諸弟子所問應答意不搖者於一切無所倚故也鷲鷲子曰善哉善

哉是爲上辯何謂菩薩諸法無倚答曰是明度無極即爲菩薩諸法無倚曰不一切乘是經惟諸法無倚也曰悉明度無極故爲諸法無所倚菩薩於是無方石止處而以默取諸法之要如無取焉是爲行諸法而無倚行也若爲菩薩說是與知不疑不望而能深解是謂知行者已爲不休如是念矣鷲鷲子曰若不休此行爲休是念若休是念爲不休此如其念行而不休者是謂常行等念等也已念等行等者則一切人必常有紹此行而得爲開士者如是衆生亦將不休此念此行所以者何人不當廢是念也善業曰善哉善哉賢者勸助爲說是致要語如賢者言行等念等則一切人不廢此行夫衆生自然念亦自然當以知此衆生恢廓念恢廓當以知此衆生

之不正覺而不念正覺亦不正覺當以知此
如是行念吾樂菩薩思惟念此行

大明度無極經卷第一

大明度無極經卷第二

吳月支優婆塞支謙譯

天帝釋問品第二

爾時帝釋與四萬天子四天王與二萬天子
梵眾天與萬天子梵輔天與五千天子俱皆
來會坐諸天子宿命功德光耀巍巍持佛神
力光明徹照釋問善業言是諸天子大會欲
聽說智度無極云何開士大士於大明中立
乎善業曰諸天子樂聞者聽我說因持佛力
廣說智度何天子未求開士道者今皆當求
已得溝港道者不可復得開士道何以故開
生死道已正使是輩求者我代其喜不斷功
德法也悉欲使取經中極尊法使上至佛佛
言善哉善哉勸樂開士學乃爾乎善業白佛
言我當報恩終不敢違之所以然者往昔如

來無所著正真道最正覺皆與弟子爲諸開
士說智度如來時亦在中學斯經妙行今自
致作佛用是故當報恩我作是說法開士受
之我勸樂勸樂以大道疾令作佛釋欲所聞
者聽所問矣問曰開士云何立智度中乎答
曰持空法立如是釋問開士大士以影弘誓
大乘所至奏五陰不當於中住溝港頻來不
還應儀緣一覺至於佛不當於中住五陰無
常不當於中住於苦樂好醜是我所非我所
不當於中住溝港道不動成就不當於中住
瘡六何以故七死七生便度去頻來道不動成就
不當於中住何以故一死一生便度去不還
道不動成就就不當於中住何以故於上滅度
應儀道不動成就就不當於中住何以故應儀
道成已便盡於滅度中而滅訖緣一覺道不

動成就不當於中住何以故不能逮佛道便滅訖是故不當於中住如來無所著正真道最正覺用無量人故作功德我皆當令滅訖正於佛中住佛所作皆究竟已乃滅訖亦不當於中住驚鷺子問設使開士大士不當於中住五陰溝港頻來不還應儀緣一覺上至佛當云何住善業言如來無所著正真道最正覺有住處乎答曰不也何以故佛無所住亦不在動搖不動搖處住亦不住亦無無住一切無是如如來不當作是住不當住不住亦不當住無住當住是住學無所住矣爾時諸天子心念諸鬼神所語悉可了知今是尊者善業所說經道了不可知善業知其心所念語諸天子是經難了難了所以者何我所道說所教起都爲空矣以斯故難聞聞而

難了諸天子心復作是念是語當解當解今尊者善業深入於法身即告諸天子設使欲索溝港頻來不還應儀緣一覺無上正真道若於其道中住皆當學明度當持守諸天子心復念所說乃爾當復於何處更索經師又告諸天子欲知我所說法者如幻人無所聞無所行諸天問今在是聞法者是人爲非幻乎善業言人如幻幻如人如求溝港頻來不還應儀緣一覺正真道者人如幻幻如佛道諸天子復問乃至佛亦復如幻如人乎曰乃至滅度亦如幻如人諸天子言滅度亦復如幻如人乎曰設使有法過於滅度者亦復如幻如人矣善業告諸天子是幻是人泥洹皆空俱無所有尊者驚鷺子滿祝子問說明度如是者誰能持奉行之答曰賢者不退轉開

士大士能持奉行之其應儀等無能受持者所以者何我所說法爲無所說亦無所處法已無所處法已無所囑累法以是故亦無能受持者釋心念尊者善業兩法寶我寧可化作華以散其上便化作甘香華以散佛及善業諸比丘上華至其膝善業即知言是華不出於忉利天上釋所散華出於幻耳釋言是華非從樹出如賢者善業所可說斯事本寂自幻樹出矣釋言是華從幻樹出也不從樹出者爲非是非是者爲非華釋言明度甚深微妙答曰然所以者何無所逮得亦無所說釋言尊者處深微妙明度於法不諍處無所有於法無所動答曰然法非動法當作是學如是學不學溝港頻來不還應儀緣一覺道作是學者爲學一切智出於諸法爲不生五

陰學受身行不學受餘法驚驚子問如是爲不學受一切智乎不學亡失不學受他法乎答曰然是爲學一切智出於諸法釋聞法便問驚驚子當云何於其中求報言於善業明度品中求釋問善業持何威神恩當學知報言持如來威神恩知釋所問明度開士大士當云何求不可從五陰求不可離之求何以故明度非五陰亦不離之不起之爲無所著無出無倚無倚是明度矣釋言大士爲大明無邊無底報言五陰皆無邊以是故當知法無邊人無底當知法無底身與作復作用是故當知之與大明等無異無中邊亦無本端不可限量一切不可得以是故明度無邊無底不可計計爲多釋問人云何無底善業言云何於釋意何所法中名爲人於法中不見

有名爲人者何以故不見有所從來處所以者何人本末皆空無所有故設使有來者有住止者但名耳何以故於名字中學有所有不曰不也善業曰用名字無所有故無作我者是故人無底正使如來無所著正真道最

滑六

十五

正覺壽如恒沙劫口說名人人復人寧有生滅者不釋言一切無生滅者善業言所以者何用一切人淨故無所起名非名不可得是故人無底明度無極名無底當作是知

持品第三

爾時諸天無央數同時三歎曰鳴經乎鳴經乎是尊者善業所說道深矣斯大明弘義如如來所由出矣有聞者學之誦之我敬視之如如來佛告諸天子誠然昔錠光如來無所著正真道最正覺時有宮宮中有是經我時

持之錠光佛授我決言若後當爲人中持悉逮佛智作佛名能如如來無所著正真道最正覺三界最尊安定於法中極明號曰天中天諸天子白佛言少有及者天中天有持大明者爲受一切智矣時佛在衆中央坐佛告除饒衆除饒女清信士清信女今是四部爲證愛欲天梵天無結愛天皆知佛告釋言高士學斯定持誦其文衆邪不得其便令橫死也忉利諸天子求佛道者未學誦獲其奧者是輩天子皆往到是學持誦者所若於空閑僻隈處亦不恐不怖也四天王釋梵及諸天子等各白佛言我當護是學持誦者釋復白佛言難及天中天是明度學者心無動搖悉受六度已佛言然善聽我說上中下言皆善釋言受教佛言我經中有欲害亂者起惡意

往未至道亡後所作終不成何以故用是高士學是經故譬若有藥其名神丹有蛇索食道逢蟲物蛇欲噉蟲即到神丹藥所蛇聞藥香即還去何以故是藥力所却如是是輩高士其欲害者便自亡還是明度威神力所馱

卷六

十六

伏也佛言設有亂者便於彼間自壞不成四天王皆護入經如行者自在所爲所語如甘露言重成道瞋恚貢高諸惡不生四天王護之所以然者學明度故心自生念有諍起者不可近我求索佛道義不可隨是瞋恚語使我疾速好心斯高士所作悉見善像釋白佛言難勝天中天乃過諸惡無與等者佛言釋是輩人或當過劇難之中終不恐無能害者善士當誦惟斯定正使死至若怨在中欲共害者如佛所語終不橫死若兵刃向者不中

其身所以然者斯定諸佛神呪呪中之王矣學是呪者不自念惡不念人惡都無惡念是爲人中之雄自致作佛爲護衆生夫學斯行者疾成佛道是經書已雖不學誦者當持其卷人鬼凶毒不能害矣宿命重殃唯斯不除

譬如得佛處若人若鬼神禽獸從一面入無能害者何以故用得佛處故其威神護過去現在當來索佛道者皆當於中得佛道人入其處不恐無畏明度所止天人鬼龍皆爲作禮恭敬護視用經德尊故釋白佛言若有書

卷六

十七

持經卷承事供養天寶名華梅檀珍琦香繒蓋幡若有持如來無所著正真道最正覺舍利起塔自歸作禮承事供養天寶華香具足如上其福孰多佛言我問若隨所樂報云何是如來一切智成是身出現於世從何義得

對曰從明度義得佛言不用是身舍利得佛也乃從一切智生得佛身我滅度後舍利供養如故若善人書是經學持誦自歸作禮承事供養具足如前則爲供養一切智已從是經中得功德無比復白佛言閻浮提人民不供養者爲不知是福尊無比耶佛言有幾所人信佛信經信比丘僧釋言信者少耳及求溝港頻來不還應儀緣一覺至求佛者復少矣佛言無量人行求佛道至於在不退轉地立者若一若兩耳學是法會成佛當爲作禮承事恭敬何以故用曉佛法世少有故過去如來求佛道者皆從是成我時亦在中如來滅度後取舍利起七寶塔盡形壽自歸作禮承事供養天寶華香具悉如前滿四天下若三千大千國土衆生悉得人道各作七寶

塔以妓樂樂之復過是如恒邊沙佛刹人人起七寶塔供養劫復劫都是欲界中諸妓樂華香繒蓋皆具如上所說其福德益多不對曰甚多天中天佛言不如書持經卷自歸護之福多無量何以故從中出如來一切智故佛言百倍恒邊沙佛刹人皆起七寶塔不在計中如是千萬億無數倍不在明度淨定計中爾時四萬天子與釋俱來大會諸天子啓釋言尊者當取誦是經佛言當學當持當誦釋若質諒神興兵欲與忉利天戰其念誦是經質諒神衆即去釋言大尊呪天中天佛言然無輩過去當來今現在十方諸佛皆起是呪自致作佛出十戒功德開士大士從中生佛未出於世時開士悉出說照明四棄四拔苦四事空五通譬如月盛滿時從空中出照

明於星開士求功德盛滿如是皆從權德大明中出當作是知學持誦是經爲至德悉具足佛言其人終不爲邪毒水火兵刃王法所橫死何以故是明度所擁護若復有餘事起若至王所及太子傍臣所與之相見轉歡喜言笑所以然者以其普慈等濟恕惠群生潤功德量用是故見者悉起立爾時有異道人遙見佛大會欲壞亂坐衆疾至佛所釋作是念當云何盡我壽在佛邊受誦是法即從佛聞受誦彼異道人遙遠繞天中天一匝從彼間道徑去驚鷺子念是中云何異道人從彼間道徑去心念是佛即知驚鷺子釋念明度異道人無善意來故弊邪念佛與四部弟子共坐愛欲天梵天諸天子悉復在中會無異人開士大士受決者會當爲人中之將自致

作佛我當往亂之是弊邪乘一轅之車駕馬四疋稍至佛所釋作是念弊邪所乘非國王瓶沙非波斯匿非釋種非維耶利四馬車皆不類之正是弊邪所作也邪常晝夜索佛短亂世人能常持心究竟明度邪便道還切利迦翼天子持天華在空中立便散佛上四面散而尊歎曰究竟道源明度之謂也閻浮提人民乃得聞見復持雜華四散佛上曰其有求者守者終不爲邪衆所害也是輩人民福德弘大何況乃學持諷誦用是法住其人前世已得見佛淨心供養欲一切知得一切智寶當從明度索之佛言然阿難白佛言無舉名布施重戒忍辱精進棄定但舉明度名何以故天中天佛言明度於度中最尊云何阿難不布施持戒忍辱精進禪定智者當緣爲

六度無極一切智乎阿難言唯然天中天不行六行不爲六度誠非大明度無極一切智之明矣佛言然大明最尊譬如地種散其中同時出生衆生得命如是阿難明度如地五度如種從中生成釋白佛言如來所說善士學持誦明度者功德未竟佛語釋我不說是功德未竟我自說書持經卷承事作禮華香名寶雜繒蓋播功德者耳釋白言我身護視是人佛語釋誦明度者有若干千天到是師聽經不解義者欲問所疑用慈於經中即自曉了是人作功德悉自見知若於四部弟子中說經時其心無所難若刑戮者終不畏何以故明度所護凶弑者去佛言我不見人當明度者人亦不見明度明度所厭也無有輕者心不恐怖無所畏父母重之沙門哀之諸

親賢友愛之或惡事來持忠正法爲解之是善士所作功德悉自見心當作是知十方無數佛國諸天人鬼龍質諒神執樂神智臆行神似人形神皆至經師所問訊聽受作禮致敬繞畢各去斯行德使然四大天王忉利天鹽天兜術天不驕樂天化應聲天梵天梵衆天梵輔天大梵天水行天水微天無量水天水音天約淨天徧淨天淨明天守妙天玄妙天福德天德純天近際天快見天無結愛天上諸天子皆往問訊聽受作禮繞竟各去諸無結愛天尚悉來下在諸天中何況是三千大千國土諸愛欲無色天子耶彼所處常完堅無燒者除宿不請餘不能動其功德悉受是時諸天來當知之釋言云何知天中天佛言是善士女歡喜時知來已當避去聞鬼神

香或龍鬼神蛇軀神來到聞鬼神香以爲曾
知已當避去當淨身體用清淨故鬼神皆大
歡喜小天見大天來便避去尊天威神巍巍
其光重明稍安徐往尊天入至經所是善士
女則踊躍喜所止處悉當淨住是人病終不

潛六

三十一

著身所止處常安隱未嘗有惡夢夢中但見
佛見塔聞明度但見諸弟子見極過度見佛
坐見自然經輪見但欲成佛時見諸佛得佛
見自然新經輪見若干開士見六度種種解
說是當作佛見餘佛刹見佛及尊經無與等
者某方刹如來無所著正真道最正覺弟子
衆如來在其中說是輩善士夢如是已安隱
覺身體淨潔且輕不復思食自輕美飽若比
丘得定自定覺心輒不思食身輒美飽如是
何以故鬼神不敢近是欲取佛者

功德品第四

復次帝釋是天下如來舍利滿中施與有持
智度無極書施與爾取何所釋言我取智度
何以故我不敢不敬舍利天中天舍利由斯
明度出天人所尊矣如我與諸天共座坐持
異牀我未至諸天子爲座作禮繞已去是座
尊故吾於斯受經諸天於彼爲禮如是天中
天明度出如來無所著正真道最正覺之舍
利一切智從中生身用是故兩分中取明度
正使三千大千國土滿中舍利爲一分明度
書爲一分取書何以故從中出舍利供養所
致譬如負債人與國王參正無復問者亦無
所畏何以故在王邊有力故也譬如無價明
月珠有是寶者其德無等所著處鬼神不得
其便不爲所中若士女持明月珠所著鬼神

即去若中熱風寒持明月珠著身熱風寒皆除去夜著冥中即明熱涼寒溫衆毒向已持珠示之諸毒即滅如是天中天明月珠尊若人目痛冥近之即愈其德巍巍在著何所便隨珠色正使持若干種繒裹珠著水中水故

潛六

二十二

如珠色水濁即爲清是珠德無比阿難問釋云何獨彼有珠耶斯土亦有乎釋言亦有不_足言如我所說者異天下寶輕不如彼德尊珠十百千萬億倍若以著篋函中其明徹出正使出去處明如故天中天一切智德至如來滅度後是一切智舍利徧布供養如故置是三千大千國土滿中如來舍利正使如恒邊沙佛刹滿中舍利爲一分是經爲一分我於兩分取是經佛語釋過去如來皆從中出自致成佛甫當來及十方無數佛刹現在諸

佛亦從中出爲人中將自致成釋言一切衆生心所求如來從明度悉了知佛言用是故開士大士晝夜求明度釋言惟求大明不求餘度乎佛言六度無極皆求開士布施持戒忍辱精進一心分諸經不及求明度譬如是

天下種樹若干色種種葉華實各異其影無異影影相類如是五度從明度出一切智種種相成無異釋白佛言影明德尊其爲難等矣天中天若有書是經承事供養華香繒蓋旛若復授與人其福孰多釋言自供養復分

潛六

二十三

與人其福太多佛言如是書經供養華香衆寶名繒蓋旛若有書經供養復分與人其福無量經師所處專說本淨其福甚多復次一天下人皆令持十戒置是四天下復置小國中國二千三千大國土如恒沙佛刹人民皆

令持十戒其福寧多不對曰甚多天中天佛言不如書是經分與人使書學之其福倍多置上十戒皆令作四棄四拔苦四事空及五通皆成得云何其福寧轉倍多不對曰甚多天中天佛言不如是書經卷與人使書若爲讀其福倍多復次學解中慧其福甚多釋白佛言云何學明度解中慧佛言有當來善士欲得無上正真道最正覺樂學明度惡友教學未知何等爲未知佛言來世比丘得經欲學惡友教之五陰無常學五陰無常求作斯學失大明獲未知佛言求者不壞五陰無常視何以故本無故如斯當爲景明之學其福無度復次一天下人皆令得溝港頻來不還應儀緣一覺道皆令成就又如恒沙佛刹人民皆求無上正真道福不如得淨定廣說義

所以然者皆由斯定得一切智十二經德皆由斯學成佛無盡佛出即生溝港頻來不還應儀緣一覺并發意求佛獲斯定者福最尊矣若有善願欲疾作佛以經施之令成大士得斯定者其福難盡釋白佛言如是天中天極安隱是開士大士疾近佛用是故受其福轉倍多何以故其得是法疾近佛坐善業語釋言善哉善哉當作是解開士受淨定疾得作佛所作行當如淨不得景定不得作佛在所問

卷六

二十四

變謀明慧品第五

爾時慈氏開士語善業有開士大士代歡喜最尊分德法雖或布施持戒所守分德法尊無蓋德被無表善業言當從是代歡喜分德之法何以故十方無量佛刹一一刹土不可

計數滅度以是本所起無上正真道最正覺
及自致滅度處其功德極度所致之德諸弟
子所作布施持戒守法分德彼德最尊過無
所著功德都天中天持戒身定身慧身無所
罣礙身度知見身安隱大慈不可具計經中
所學諸功德都計合積之代歡喜德福尊無
蓋以斯喜行用求無上正真道心念言持是
施與我作無上正真道當作是行求心已來
悉逮得之慈氏語善業作是求已來者不逮
得作是施者善業言有不施者當從何得亦
無所守從何出生若意悔還爲墮四顛倒所
施與無常謂常苦謂樂空謂實無身謂有身
意悔還所信還持是心求佛作是施與作無
上正真道慈氏語善業新學士女不當於前
解慧也何以故其所信樂所造德本恐亡還

當爲不退轉說之若在善友邊久者解說之
是人不可懼者也如是代歡喜極尊持是施與
作一切智持是心作是施與代歡喜是心盡
滅無處不可見何心作是施與得無上正真
道何心是心心無兩對心無身當作何施與
乎釋言恐新學士或怖而亡還云何作功德
施與最尊代歡喜云何以作施與得無上正
真道善業言斯土開士大士悉具足供養諸
佛破壞衆惡以等行如一降伏邪黨棄捐重
擔所有福德罪垢都寂戒定慧解脫度知見
所願已獲十方無數刹土有滅訖者所作分
德其尊無上何因開士不悔心想云何不悔
心無所想持是施與作上行者正使是心念
自了知之作是曹想不悔心想如悔所喜悔
正使心念復了知是心作是爲想悔心悔喜

悔正使開士持其心了知作是爲想覺持何等施與持何所心了知作是覺持何等施與持何所心了知是心諸法何所法持是施與爲等與不及作是施諸過去當來今現在佛所有功德及弟子未得道者天龍鬼神諸聞經初發心學者都合積累代喜最尊矣持是功德復知是法盡滅無處亦無法作是施與無想悔無心悔無喜悔作是衆所不逮是爲無上正真道施與他有分德不諦明之不作是施與何故所致無所有代喜分德亦空開士作此明之諸佛所滅度者持所施與功德使我悉得之如一作是知所作無上正真道是所作不在想過去所知盡滅想無處想作念得作是想非施與也不作是想爲施與當作是學開士大士權德當於是中索之未

得明度不得入是法中所持分德中無得作是聽身識是有德之人有想便著反欲苦住如來無所著正真道最正覺不樂持施與持施與見虛空何以故極大得滅訖視佛有想者爲礙施是與大逮不當作是逮如來施與當諦何以故雜毒病故作是施譬如美飯雜毒著中色好甚香無不喜者不知飯中有毒愚人食之歡喜飽滿其食欲消時必危身命矣夫不知取施之義者不曉將護兩礙之難必如毒飯之說也若高士欲施當如徃古來今諸佛持戒身定身慧身解脫身度知見所現慧身及諸弟子於中所作功德是所佛緣一覺施與持是功德都代歡喜施與以作無上正真道持是想施與時悔謂之有用是故譬若雜毒飯如有德之人當作是覺知過

去當來現在佛云何施與何因成就出無上
正真道隨如來教持是施與知所作功德生
時身相經所得了知成時我作是代歡喜自
致佛道無過也終不離如來法不雜毒也當
作是施與如戒如定如慧如解脫如度知見

卷六

二十七

慧所現身無欲處無色處無空處亦無徃古
來今從中來者譬若無所有是所施與諸法
亦無所有是爲成施與中無毒也若作異施
爲行反施惟開士所施是法若佛皆更知作
是施自致作佛今我施已作無上正真道佛
言善哉善哉善業所作如佛又三千大國土
人皆使念四等心不如上施其尊無蓋也復
次三千大國人皆作無上正真道使如恒沙
佛刹人共供養之震越衣服飲食牀卧病瘦
醫藥事事具足如恒沙劫隨恣所樂云何其

福寧多不善業言甚多天中天佛言代喜功
德福過其上善業言功德如恒沙佛刹不能
受也佛言善哉善哉持明度者是所施與乃
從本來福出其上爾時四天王與二萬天子
以頭面著佛足却白佛言弘慈普施明度德
化巍巍無盡乃至於斯乎何以故學明度開
士大士所勸樂故忉利天鹽天兜術天不驕
樂天化應聲天諸天子各以寶樹名華雜香
以散佛上繒蓋幢幡天衆妓樂歡心貢佛而
歡曰極大施與天中天大士權德乃作是施

學明度德大士所勸樂梵天梵衆天梵輔天
大梵天水行天水微天無量水天水音天約
淨天徧淨天淨明天守妙天玄妙天福德天
德純天近際天快見天無結愛天諸天子皆
以頭面著佛足作是言開士學明三界希有

切玉名也	不正	也	胃臆	叶切	胡
波	斯	匿	於力切	切	切
楚語也	王召也	也	切	臆	切
繒	帛也	切	肉也	臆	切
弊邪	也邪	切	戮	殺也	切
篋	函	篋	誥		

大明度無極經卷第三

潛七

具月支優婆塞支謙譯

地獄品第六

鷲鷲子白佛言明度道弘普入景慧天中天
自歸明度無極天中天行寂無穢去冥示明

潛七

一之一

巍巍至尊無不成就天中天無目惑者授道
慧眼無生無滅苦者得安悉入無想明度慧
門大士之母拔生死根大神已足三合十二
轉明度天中天開士大士當云何於中立天
中天佛言敬明度當如敬佛於中立自歸當

如自歸佛精心念鷲鷲子比丘何因發是問
則報之曰是明度護於開士代歡喜功德施
與無上正真道之恩也若有布施持戒忍辱
精進禪定皆不若譬人生墮地盲若士衆之
行無前導者欲有所至不知行夫五度如盲

者開士雖明度欲入一切智中不知所行明
度將護五度與目與名鷲鷲子白佛言云何
入明度中守佛言觀五陰無從生滅見五陰
無生滅處明度亦然又白佛言作是守者爲
逮何法曰逮無所逮法無所逮法名曰明度
釋白佛言明度不逮一切知耶佛言不作是
逮者無所著無名無識釋問復當云何逮佛
言如無所逮故能逮釋言少有及者天中天
無如明度諸法無生無滅善業白佛言開士
作是念者離明度佛言明度空無所有是故
不遠不近不成不壞問曰信此爲信何法佛
言爲不信五陰不信溝港頻來不還應儀緣
一覺善業言大明度是開士法佛問何緣知
大明度爲開士明度乎對曰五陰不大不小
不退不亂如來一切智有十種力不強不弱

不退不亂何以故不退不亂一切智不廣不狹天中天若有是念想爲不求大明威神欲度衆生是爲著何以故人本無大明度亦無人壞明度義然人所出生乃如來現力如是驚鷺子白佛言若有信是法者不疑者其

人從何來生求道已來幾時乃得解中義教佛言從他方佛刹來生已問其義聞即恭敬視師如佛念曰吾已見佛矣善業白言明度可得聞見不曰不可得見也開士求佛已來幾何時隨此法佛言非一輩學也各有本行

洛之

二之二

或前供養若干千佛具持經戒未時聞斯定棄而不敬來世佛所聞當復棄去佛言其人自隨身意受愚癡心自用以斯罪自弊聞人說明度復止之止此者爲止一切智爲止往古來今將導明眼矣以斯愚罪斷於經法輕

易應儀受不信之道死入無擇獄其歲難算勤苦毒痛不可具言天地壞時當適他方大地獄中展轉三塗劫數無量驚鷺子白佛言其罪等於五逆微喻之耳佛言其罪難爲譬喻是明度學誦時若有心念非如來所說止

人學者自壞復壞人自飲毒復飲人是輩人自亡不曉明度復誤他人學士無見斯人坐起言笑通好飲食也何以故斷是經故斯人自在冥中復投入於冥中其人自飲毒煞身無異也斷經之愚人信其言罪苦等矣誹謗

洛七

三

明度爲謗十二部經也驚鷺子言佛未說謗斷經罪入太山其形類如受身大小願哀釋之佛言無間聞之必恐中熱沸血由面七孔憂焦損命由斬華著于盛日萎枯而喪愚夫死然也其身長大醜惡晷處無不惡見吾難

說彼毀辱法人處地獄中所受形類也又白
佛言願說其罪令末世人敬奉明法畏慎不
犯謗斷經罪重痛如彼佛言以示人大明後
世聞者誹謗得罪在地獄中苦痛無期其罪
可知矣善業白佛言善人常當護身口意行
夫謗明法乃致斯罪佛言癡人於我法中作
沙門誹謗明度言非止斷者為止一切智十
二部經爲斷三世諸佛道爲斷比丘僧者受
恒沙劫罪善業問謗誹斷經者凡用幾事佛
告斯士女無戒爲邪所中故不樂深經以斯
二事斷明度矣又用四事一者隨惡師言二
者不以順學三者不承開士法四者主行謗
斷經法好索人短以自貢高是爲四事善業
白佛言不覩深歸少有信者世尊曰然重問
何緣少信佛佛言往古來今五陰不著不縛

不脫所以然者以其無形明度義然故少信
者矣

清淨品第七

善業白佛言少曉明度無極未狎習者佛言
五陰清淨道清淨道清淨五陰亦清淨適等
無異五陰清淨一切智清淨一切智清淨五
陰亦清淨等無異今不斷前亦不斷後今不
壞前亦不壞後今正等無異鷲鷲子白佛言
甚深清淨天中天佛言清淨鷲鷲子言極明
虛無無瑕穢無所有無不徧無生欲無色想
清淨天中天佛言清淨矣又曰五陰清淨天
中天佛言不知不隨不想清淨矣又曰一切
智明度不增不減何以故無所有經護清淨
佛言清淨矣善業白佛言意清淨五陰清淨
五陰清淨意亦清淨天中天佛言本清淨矣

一切智清淨道亦清淨佛言本清淨矣五陰無邊意亦無邊佛言本清淨矣大士明照其源其故明度本清淨不在彼不在此不在中本清淨矣善業白佛言開士有想便離明度遠佛言善哉如爾言有名想便著曰難及天中天是明度如來安濟群生說是於著驚鷺子問善業何所爲著答曰念五陰空著念往古來今皆著釋問善業何因著答曰心想念施與無上正真道心無當何等施是善人歡樂教人於本空如是無過如佛所教出於諸著中去佛言善哉汝爲開士大士本空不著復次若有深著想念如來隨所想便爲著往古來今佛無所著法代歡喜以施作無上正真道者法無往古來今一切不得有施想無念無見無聞無心不念心對曰甚深天中天

佛言明度本清淨矣善業言自歸明度佛言法無作者無作無上正真道者善業言如佛教無作者佛言不兩法本無一本無是本無無作是本無者如是一切疾過著去對曰難了天中天佛言如是無得佛者對曰明度不可計也佛言然心不自知心善業言無作明度者天中天佛言無師作者求明度不五陰求不空五陰求爲求明度五陰不滿爲非五陰不求爲求明度對曰難及天中天著無著天中天著無著是者爲不著佛言五陰不著不求爲求明度五陰著爲不求明度溝港頻來不還應儀緣一覺著爲不求何以故著出一切智中如是開士著不著爲出爲守一切智對曰難逮天中天甚深所說法說之不減不說不增佛言如是不減不增所以然者如

來盡稱譽虛空亦不增減譬如幻人譽毀不能使其有喜感增減矣吾經說衆生各學誦經亦不增減慊苦求明度守者不懈不恐不動不轉隨是教不捨還何以故作是守者爲守空諸天人鬼龍皆當爲作禮以其服大慈法鎧與虛空戰濟衆生之禍現世景福之故也善業言被鎧譽虛空舉三處人至大精進上勇猛天中天法如虛空故索無上正真道欲得平等最正覺有異比丘心念自歸明度者爲無生滅法釋語善業作是求隨是教何因隨是教善業言明度隨是教者爲隨空教釋白佛言學明度者當護幾聞善業云何釋見法不當所護者隨是教者衆生不能得其便也行明度護爲護虛空云何釋有力者能護響不曰不能也如響亦無想念爲求明

度持佛威神三千大千諸釋梵四天王諸尊天王一切皆來爲佛作禮遶三匝却住一面念千佛號字形容被服所出國土皆如釋迦文其弟子字皆如善業問明度者皆如釋其本教授時皆同一處開士大士皆被大鎧學明度佛告善業慈氏開士作無上正真平等覺時亦當於是說明度曰云何說五陰不受說不空說不著說不脫五陰說歎曰清淨天中天佛言五陰清淨明度清淨如空也對曰五陰無穢天中天佛言無穢矣善業言學是者不橫死也諸尊天常隨之經師月八日十四日十五日說經時諸開士常來大會佛言是善士汝得功德甚多難計所以然者明度無所近法無所取經無有無得無瑕無點無求無想是爲求明度無所觀見法諸天子心

大歡喜同聲而歎曰斯天下乃再見經輪轉
佛告善業不兩經輪轉無所從生法不來不
去如是善業言永安開士諸法皆無所罣礙
作無上正真道平等正覺佛言無經輪轉無
經還何所爲輪轉無見經還何所爲經輪轉
無見經無觀法何以故諸經所生如虛空無
轉無去作是說便爲說經無說經者無聞者
無證是說經者爲滅度是說經爲無人善業
白佛如虛空無極悉明度平觀諸法無不明
了天中天本空無上諸法不可逮無著無身
無去無來無有無持無盡無根無所從生無
滅無作無師無知無想無所罣礙無適無壞
無本如幻無見如夢無我清淨無穢不可見
無處定不動搖無念平等不動法不移無欲
法無異無所生向無想去垢盡恚恨無人人

本無不觀法無所起不至邊無所止不腐不
敗無不入諸應儀緣一覺所不能及不亂無
誤不可量無小法無形無所生起無苦諸法
不相侵無我無所著空諸法無所出力無能
勝者不可計出計去無所畏心不懈如來諸
法本無無師無爲寂寞明度無極天中天
悉持品第八

帝釋作是念今見佛聞明度無極者過去佛
時人也何況學持諷誦用是教住其人前世
供養若干佛從問事已是善士爲更見過去
正真正覺從是深法聞說時不疑不恐不畏
不難驚鷺子白佛言是深明度開士大士信
受者視當如不退轉何以故本精進故釋語
鷺鷥子是法甚深從斯定難乃爾乎聞其義
而不信者彼求佛道未久以斯爲難矣自歸

明度爲自歸一切智矣夫一切智者是明度所照明當作是住解慧釋白佛言云何於明度中住解慧佛言善哉釋若今作是問持佛威神使若發此問耳開士求明度五陰中不住爲應行五陰不究竟爾故不於中住驚鷺

卷七

子白佛言甚深天中天是法難見無邊佛言五陰甚不住不隨不入五陰中驚鷺子言有不退轉開士當於前說之聞是慧法不厭釋問驚鷺子未受決開士若於前說將有何異曰未受決者聞之或恐退若大士聞斯義得淨定者疾近受決不久或見一佛若兩佛便受決或自於斯中受決得無上正真道佛言如是求佛乃從久來當作是知未受決者當聞見是法驚鷺子白佛言我樂是語樂人中之安佛言樂者當於佛前說之驚鷺子言譬

如開士至德自於夢中升佛座坐當知斯開士但欲成佛如是天中天是明度若有得者其功德欲成滿近佛佛言善哉是語乃作是樂如佛威神復白佛譬若欲行萬里若二萬里到大深澤中遙見牧牛羊者境界居舍叢

卷七

樹心中作是念想郡縣聚落將欲見之稍稍前行但欲近郡縣不復畏盜賊如是天中天開士大士得是法今近受決不久不復恐墮應儀緣一覺道中何以故上正想見已欲見大海者便稍稍往想見其山林明慮諦見海尚遠即不想見矣若但欲至無復山樹之想矣得此法者雖不見佛從受決今作佛不久譬若春時樹葉稍欲生出當知此不久華葉若實當成熟何以故上想見葉華實當知成熟斯土有眼者大歡喜用見葉華實故當知

成熟如是開士大士上想受決不久今受決作無上正真道佛言善哉善哉鷲鷲子持佛威神使若說明度善業白佛言難及天中天悉豫了署開士大士作如來無所著正真道最正覺佛言用是故開士大士晝夜慙傷群生欲使其安自致無上正真道成作佛時悉爲說經善業言云何求成就作佛佛言經中作是觀五陰不過爲求明度不觀見法爲求明度對曰不可計天中天所說佛言如是五陰不可計不可求對曰誰當信是者從是求開士大士佛言何所爲求正使求者但爲名耳是中開士大士明度力四事佛法一切智無所近何以故力不可計四事佛法一切智皆不可計五陰諸法亦然也正使作是求爲無所求爲求明度正使作是求但爲名耳

善業言甚深天中天斯乃寶將中王與虛空戰勇德難勝令佛行業傳之無窮佛言然爾故開士欲疾書是經至死何以故於寶中多有斷起善業言弊邪存想欲使經斷佛言邪欲斷經會不能勝鷲鷲子問持誰恩不能中斷佛言十方現在諸佛威神悉共擁護是開士大士佛所授定邪不能斷也又白佛言是明度若念誦持學書者諸佛威神皆共擁護之佛言我眼視是學持誦者最後書持卷者當知是輩如來眼所見是至德受持是經者潛七疾近佛座得大功德如來去後是法當在釋氏國彼賢學已轉至會多尼國在中學已復到鬱單越國在中學已却後我經但欲斷時我斯知已爾時持是明度最後有書者佛悉豫見其人已佛所稱譽也鷲鷲子問佛鬱單

越國當有幾開士大士學斯定佛言少耳是經說時聞不恐不難爲疾近如來其人前世聞如來已學開士至德持戒完具多所度脫是輩索佛道者我知是高士近一切智其所生處志尚所歸當學斯義欲求無上正真道是人行尊邪終不能動使捨佛志也聞明度已得極歡樂尊得大乘德逮近無上正真道雖不見我後世得是法爲面見佛佛說斯語如矣儻有求道者當共教勸令學佛道我悉代歡喜有作是教者心復心轉轉相明自在願生何方佛刹所生異方面見佛說經時當復於後教人求佛驚驚于白佛言難及天中天云何乃有是如來往古來今斯高士何法不知何求不得云何乃有是決甫當求佛者是輩爲精進逮入六度中學佛言是輩人有

求經不求者會值經法願不離經索無止時不索自得六度驚驚子問有覩斯明度定衆經由之出乎佛言有解明度者諸經出之所以然者是佛教法當教一切人勸令取佛亦復自學斯經深義彼諸高士所生逢佛獲六度無極矣

覺邪品第九

善業問佛高士種類欲學當何以覺其難天尊曰欲學明度無極心不喜者當覺邪爲心妄疾起者心欲學卒鬪亂起若書是經雷震畏怖開士轉相調戲左右顧視書是經邪念不著經從座起去自念我不受決法不在明度中便亂心起內不得靜自念我鄉土郡國縣邑不聞是經意悔捨去其人却後若干劫聞餘道經喜不能任明度而隨異經便墮應

儀緣一覺道中是爲枝葉譬若男子得象觀其脚云何黠不曰不也天中天佛言如是求開士道棄明度去及修學餘經得應儀緣一覺道曰黠不曰不也天中天尊曰譬若欲見大海而覩陂水曰斯巨海矣黠不曰不也

天尊曰開士棄深明度取餘經墮應儀緣一覺道中有智無對曰不也天尊曰譬若作絕妙殿舍匠師意欲齊日月宮殿於善業意能作不對曰終不能也斯匠黠不對曰不也天尊曰求開士道聞明度已復棄去學應儀緣一覺道法欲於中求佛是人黠不曰不也天中天佛言譬若欲見飛行皇帝反見小王形容被服諦熟觀之曰斯但是飛行皇帝也是人黠不對曰不也天中天佛言甫當來開士得深法已復棄去入應儀法中欲求佛云何

有智無對曰不也譬若大飢得百味飯不食也欲得六十味飯商人得無價明月珠持水精塗明月珠欲令合同是人黠不對曰不也佛言甫當來開士得明度經反比應儀道棄去入應儀法中欲得作佛復次當書時邪使財利從他方來聞利便棄法住不能書成也當覺邪爲書是經時莫言我書莫作是語也當從經中聞決作是言者邪得其便矣不爾者邪界空書時意或著世兵賊鬪亂親屬財利飯食病瘦醫藥念父母兄弟及衆餘念開士當明覺斯爲邪使復次我有名深經邪從次讀之便行亂學明度者意令釋本崇末便不得變謀明慧佛言開士大士欲說變謀明慧從明度索之而今逮得復棄去於應儀道中索變謀明慧是開士黠不曰不也天中天

佛言受經人欲聞法師便不安正使安欲與明度受經人捨去師徒不和書不成也學人來受師欲至他方兩不和矣或念在衣食財利受經人亦無用施本不得明度如是當覺邪爲受經人正使無所愛惜不逆師師有斯

卷七

十三

經弟子問事師不肯解之受經人費恨退或時師欲說受者不悅也師若身疲不能起說經學士志銳而不得學者當覺邪爲復次是法說時書時儻有來者說地獄餓鬼禽獸大勤苦當早斷之作應儀無荷重患矣若復於

衆譽天上樂云於彼五所欲自恣所存亦可一心念空然雖獲所念會當別離受彼衆苦不如於斯索溝港頻來不還應儀道莫與壞敗虛空從事復次師尊貴心自念有敬歸我者我與明度不者則止學人自歸不避劇難

師不肯授欲到四劇怖中又告之曰穀貴之處虎狼賊中五空澤間我樂往彼爾諦思議能隨我行忍此勤苦不得後悔弟子憂曰師具解與不肯相授吾奈之何乎師徒志乖明度書學誦經經行之時弟子慍獸不復受學稍捨就俗令經法義擁當覺邪爲復次師健乞勾多方便欲懈墮去便諂語學者我當到某處有所問訊如是不知當學誦經行時遇此當覺邪爲復次弊邪常索其便如斯之惱無得受深法者善業問何因如茲佛言弊邪主行誹謗明度言我有深經其義玄妙餘皆非法也是故新學開士心疑恐非明度無極終不學邪事一起時有開士深守禪行便得溝港道是爲證

照明十方品第十

善業白佛言佛說明度無極照明於世何謂
照明天尊曰如來持五陰示於世又問云何
視現壞五陰現世邪不壞現世乎天尊曰五
陰本無壞不壞何以故空想願無壞不壞無
所生無壞無所識無壞不壞五陰本空想願

清七

十四

無所生無所識明度示現於世無量人心如
來得明度悉知其源何等爲知其源人本心
本心本人本等無異如是明度出如來示現
於世復次善業疾心如來從明度悉知何等
爲疾心亂心即知經本出入於心中本無入
經亦無出經心故爲經本經故爲心本本經
不疾不亂即知何等爲疾心即知隨其疾盡
盡爲無所有爲心如無所有不疾亂是爲疾
心即知如是明度出如來示現於世愛欲心
本即知瞋恚心本即知愚癡心本即知何等

愛欲瞋恚愚癡心本即知愛欲本心非愛欲
心瞋恚心本非瞋恚心愚癡心本非愚癡心
何以故心本不現無想無想是無愛欲瞋恚
愚癡是爲本無如本經無本如是明度出如
來愛欲瞋恚愚癡心斷即知何等心斷即知

心斷非愛欲也非瞋恚也非愚癡也何以故
愛欲心斷本瞋恚心斷本愚癡心斷本皆無
所從出無有本無所從生諸法無所從出無
愛欲愛欲斷無瞋恚瞋恚斷無愚癡愚癡斷
不可得見如是明度出如來示現世間爲有

清七

十五

德爲人故曠大心即知無大小無益心無去
心何以故心本斷如是出如來用有德用人
故無邊幅心即知是心不去不來不住何以
故本空無所出本無不來不去不住如是不
可量心即知不增心身中心知如虛空不可

計如是心知明度出如來不可計人未見心
即知何以故無想一切見經諸法如心等心
如諸法想非諸法諸法非心想何等想非諸
法何等非想心諸法無想心亦無想不見如
是明度出如來欲得是致是用有德用人故
何等欲得是致是一切欲得致在五陰中住
欲得從是便致是善業如來云何欲得是因
致是從死致死是爲色從死致不死是爲色
從不死致不死是爲色不有死不無死是爲
色五陰如有世無我是爲色無世有我是
爲色有世有我無世無我是爲色不有世不
有我不無世不無我是爲色如是得世本源
得我本源是爲色不得世本源不得我本源
是爲色有本源無本源是爲色不有本源不
無本源是爲色是命是身是爲色非命非身

是爲色五陰亦爾是爲欲得是因致是從我
身起如來用人所著所縛所故即知爲知過
去如來知時知今如來知時知何等知色知
如本無五陰亦爾如來五陰何等爲知如本
無五陰本無如來本無作是見本無五陰本
無世本無諸法亦本無溝港頻來不還應儀
緣一覺本無如來亦本無一本無無異無所
往無所止無想無盡如是本無無異如來從
明度中出悉知之是故名佛矣善業白佛言
甚深天中天誰當信是者獨得應儀及不退
轉乃信耳佛言本無無盡時如來所說無極
釋與萬天子俱梵衆天與二萬天子俱到至
佛所頭面著佛足却住一面愛欲天子梵天
子俱白佛言天中天所說法甚深云何其想
佛告諸天子虛空著無相無願無所住如虛

空無所罣礙諸天龍鬼神不能動也何以故
是想無作者五陰不能作想人非人所不能
作佛告諸天子若言有作虛空者寧信不對
曰不信也天中天無作虛空者何以故虛空
無色天尊曰是想常住有佛無佛是想住如
故如來悉知是諸天子白佛言是想甚深如
來悉知無所罣礙明度是如來自在道是佛
所居處也佛告善業如來恭敬於經承事自
歸何謂是經明度是經如來從是得無上正
真道用是故我恭敬經當報經恩諸法無作

悉知無持來是爲報經恩善業白佛言諸法
不知不見何等爲明度出如來示現於世天
尊曰諸法無所住如是悉知見出如來示現
於世五陰不見作是示現於世何等不見者
五陰無因緣不見不見是爲明度出如來示

現於世如虛空示現於世示現於世難得清
淨是爲示現於世

不可計品第十一

善業白佛言極大究竟明度無極無量無與
等者佛言然如來無師一切智是故明度不
可稱量安隱究竟無與等者善業白佛言云
何天中天如來無師一切智無量無邊佛言
五陰不可計量諸法亦爾五陰無量諸法邊
幅無獲其際者用何等故五陰諸法亦盡處
云何善業虛空可計盡不對曰不可盡天中

天佛言諸法亦然用是故如來法諸法無邊
量用法無量故發心起學無量明度如是本
無心心念譬若虛空無心無念有心有念因
隨作是說不可稱計時五百比丘二十比丘
尼得應儀六十清信士清信女皆得溝港二

十開士逮得無所從生法樂皆當於是賢劫中受決對曰甚深天中天明度極大安隱究竟佛言如爾云矣出一切智諸開士緣一覺道悉從中出譬若轉輪聖王一切國土皆爲臣隸王無所憂佛法緣一覺法應儀法皆從中出立五陰不受不入溝港頻來不還應儀緣一覺一切智道不受不入善業問何等一切智不受不入佛言云何若見應儀等所入不對曰不見也天中天佛言善哉善哉我亦不見如來所入處如我無所入一切智亦無所入愛欲天子梵天子俱白佛言甚深天中天明度難了也正使三千國土人民過去佛時所作功德一切皆信已具足過一劫方是深明度中樂一念不可量深出彼德有餘佛告諸天子正使復有賢人聞是深法已得

證疾使彼輩所信樂過一劫其功德不及是也諸天子聞是頭面著佛足繞已稍稍却遠俱不復現各自還去善業白佛若有開士大士信是明度者從何來生佛言譬如新生犢子不離母如是開士大士聞明度已終不離經師爲從人道中來生善業白言若有逮是功德有從他方佛刹來生者無佛言有他方佛刹供養已從彼來生於兜術天上從慈氏開士問慧今欲求是法不懈持是功德復逮得是經若有前世時聞不問中慧今生聞是經於中有疑猒不信樂其人前世不從師問中事復次開士大士前世時聞是問其中慧若一日二日三日至五日持是功德今復逮得是經便信樂之若有欲樂聞時用是亂故其心數轉如秤乍低乍仰從新學來如是少

信樂當墮兩處應儀緣一覺道中

譬喻品第十二

佛告善業譬如大海中船卒壞其船中人不取板橋不能得渡必於水死若得板若橋有健者乘騎便不死當知順隨海水出也開士

卷七

十九

大士有信樂有定行有精進欲得無上正真道而不得明度變謀明慧不得學當中道得應儀緣一覺道其有信樂定行精進欲逮無上正真道得學明度權慧者終不中道懈過出應儀緣一覺去正在無上正真道中立譬

若士女持罍瓶取水知不久必壞所以然者未成故學不逮此深法終不能逮一切智便中道歇却墮二道中譬若持瓦瓶行擔水安隱歸至何以故已成故學得深法知終不中道自恣心止無上正真道譬若大海中船不

慎護以財物著中至於道壞財物離散亡其重寶如是開士大士正使至意學不得深法當知中道歇便亡名寶中道懈怠墮二道中譬若有人施張大海中故船補治持財物著中有所至不中道壞必到其處如是開士大士有信樂定行精進學又得深法終不中懈止上至無上正真道中立終不墮兩道正向佛門譬如人年老而身病云何是人能從牀自起不善業言不能天中天或時起無力不能自致正使病愈能自起會不能行步佛言如是開士大士具如上所行學不得深法而欲逮無上正真道終不至佛當中道懈怠墮二道中譬如老病人除愈欲起行有健人來扶持之告曰無恐自我相送終不中道相棄送著所樂處如是具有上行開士學得此深明

度無極變謀明慧當知終不中道懈必能究竟於中得無上正真道

大明度無極經卷第三

潛七

二十

音釋

狎習狎胡甲切狎習謂親近習熟也 瑕穢瑕胡加切玷也穢胡加切玷也
 感憂憂倉歷切也 調戲調徒弔切戲徒弔切 慍慍於問切也 黠黠於問切也
 乞乞古大切乞請也 陂陂彼池切也 銳銳以芮切也 慍慍於問切也 黠黠於問切也
 乞乞古大切乞請也 陂陂彼池切也 銳銳以芮切也 慍慍於問切也 黠黠於問切也

大明度無極經卷第四

潛八

吳月支優婆塞支謙譯

分別品第十三

善業白佛言云何阿闍浮開士學明度無極
佛言當與善友從事以善意隨明度教何等
為隨教所布施持戒忍辱精進禪定智慧當
施與作無上正真道莫著五陰何以故明度
一切智無所著莫得樂於應儀緣一覺道如
是善業阿闍浮開士稍入明度中善業言開
士慊苦天中天欲索無上正真道者佛言如
是慊苦安靜於世為十方護為自歸為舍為
度為臺為導何等為護生死勤苦悉護教度
脫是為護生老病死悉度之是為自歸得無
上正真道最正覺得如來為說經無所著是
為舍又問何等為無所著佛言五陰不著不

縛是五陰無所從生無所從滅是為開士得
佛時為世間舍何等開士得無上正真道最
正覺為世間度度五陰非五陰五陰為度度
為諸法善業言如佛說度為諸法諸法得最
正覺何以故無所著故佛言如是無所著開
士慊苦念法不懈得無上正真道最正覺因
說經如是為度世間何等為世間臺譬如水
中臺其水兩闢行如是五陰過去當來今現
在斷五陰斷者諸法學亦斷諸法斷者是為
定為甘露為泥洹開士念法如是便為說法
如是得無上正真道時為世間臺何等為導
如是具得如上說五陰諸法空無來源無去
迹如虛空無異無想無處無識無所從生如
夢如幻無邊無異善業白佛言甚深天中天
誰當了是者佛言求佛以來久遠乃信之耳

過去佛時於彼所作功德如是人者乃明之矣又問何謂求佛已來久遠佛言去離於五陰已來不復有之乃明是深法如是開士爲導無量人善業言是爲人之道佛言然開士得如上所行爲無量人之道是爲大盟誓

潛八

二

爲無量之人誓不縛於五陰不終於應儀緣一覺者不於一切智不縛於諸法是故爲盟誓善業言開士求深明度不愛三處應儀緣一覺至佛甚深天中天不有守者不無守者從明度中爲無所出法爲定守爲不守諸法爲守無所有爲守無極爲守無所著佛言如是在明度中者當如是不退轉開士於明度中無所適著終不隨凡夫語不信餘道不恐不畏不懈怠當作是知其人於過去佛已受斯明度也復白佛言開士不恐不畏不懈怠

何緣當念明度中觀視佛言心向一切智是爲觀何謂心向一切智佛言心向如空是爲觀視不視不可計一切智如不可計是爲非五陰不入不得不知不有知不無知無所生無所敗無作者無來源無去迹無所見無所

在如是不可限虛空不可計一切智亦然無作佛無得佛者無從五陰中得佛者亦不從六度得佛愛欲天子梵天子白佛言甚深天中天難曉難知佛語諸天子如是如來視如是安隱甚深是知悉知不退轉無上最正覺

潛八

三

亦無最正覺諸天子白佛言希有信是經者愍念世間故說之世人所欲皆著佛言如是本無品第十四

善業白佛言諸法隨次無所著無想如虛空是經無所從生諸法索之無所得愛欲天子

梵天子言善業所爲如如來教但說虛空慧
善業言如來是隨如來教何謂隨教如法無
所從生爲隨教是爲本無無來源亦無去迹
諸法本無如來亦本無無異隨本無是爲隨
如來本無如來本無立爲隨如來教與諸法
不異無異本無無作者一切皆本無亦復無
本無等無異於眞法中本無諸法本無無過
去當來今現在如來亦爾是爲眞本無開士
得本無如來名地爲六震是爲如來說本無
是爲弟子善業隨如來教復次五陰溝港頻
來不還應儀緣一覺不受是爲隨教驚鷺子
白佛言本無甚深天中天當說本無時二百
比丘得應儀五百比丘尼得溝港道五百諸
天人人民皆得無所從生法樂於中立六十開
士新學得應儀道佛語驚鷺子是六十人過

世時各供養五百佛皆布施持戒忍辱精進
禪定不知定雖空不得明度變謀明慧之護
今皆隨應儀道中開士有道德空無色無願
不得明度變謀明慧便中墮彼兩道譬有大
鳥其身二萬里無翅從天上自投中欲還寧
能不對曰不能至地欲令身不痛寧能不痛
乎對曰不能或悶或死何以故其身大而無
翅正使開士如恒沙劫作布施持戒忍辱精
進求色定不入空不入明度不得變謀明慧
心大起索佛道一切欲作佛便中道得應儀
緣一覺若於佛所具如上行又聞佛一切智
者念求如色是爲不持如來戒定慧不知一
切智但聞聲心想如聞耳便從是作無上平
等最正覺會不能得心想如聞耳便從見作
無上平等最正覺會不能得便中道墮彼何

以故不得深法故驚鷺子曰佛言如佛所說
念中慧開士離深法便得應儀緣一覺若真
欲得無上正真道最正覺者當學明度變謀
明慧愛欲天子梵天子白佛言難曉明度無
上正真道善業言難了天中天如我念是慧
者無上正真道易得耳何以故無有當何從
得佛何以故諸法皆空索法不可得當作佛
者索法無所得是求佛易得耳驚鷺子言如
所說者難得何以故空不念當作佛是法如
虛空設易得者何以恒沙開士皆逮報言云
何用五陰逮乎曰不也離五陰逮乎曰不也
云何驚鷺子曰五陰本無寧逮乎曰不也離
之有法逮者不曰不也云何是本無使逮不
曰不也離之有法使逮不曰不也是法不得
何所法使逮者驚鷺子曰如子所說大士善

逝都無逮者佛說三有德之人求應儀緣一
覺至佛道於三不計三爲求一道如善業所
說滿祝子語驚鷺子善業說一道當問驚鷺
子言說一道我用是故問答曰云何於本無
中見三道耶曰不見也何以故從本無中不
可得三事善業言本無一事得乎曰不也於
本無中得一道乎曰不也善業言設是諦不
可得者何故復說應儀緣一覺佛如所說道
本無無異聞本無心不懈怠是必得最正覺
佛言如爾無異持佛威神使若說本無等無
異驚鷺子問何等爲覺佛言無上正真道即
是也善業問佛何等爲成就於開士佛言一
切人皆等視慈心加哀不得瞋恚作是語當
作是學

不退轉品第十五

善業問佛不退轉開士大士當何以比觀其行相如是佛言如逮得禪者不動不搖如應儀地如緣一覺地如佛地如本無終不動佛說本無聞者不言非虛空本無本無是所有無無本如本亦不言非如聞已若轉於餘處

聞終不疑不言是非如本無立其所言誠而重不說不軌凡夫逆道之作不觀視用是比相行具足知是不退轉大士復次不形相沙門梵志面貌是別之諦知諦見終不祠拜華香施天亦不教他人爲用是比相行具足知之不生惡處不作婦人身用是比相行具足知又不退轉大士持戒身自不殺教人不殺身自不盜教人不盜身自不姪教人不姪身自不兩舌惡口妄言綺語嫉妬恚癡是十戒皆自持復教彼守行夢中自護十戒面見如

是用是比相行具足知又學諸法用是心學是法令群生安隱爲說經持是經授令分德願群生令得斯淨定以明自立用是比相行具足知又大士深法說時終不疑不言不信亦不恐怖所信賴美少睡卧行步出入不亂心徐行安諦擇地而行被服衣中常清淨無蚤蟲塵垢亦無憂身中無八十種虫所以然者開士大士六度功德過於賢聖稍欲成滿身心淨潔悉受高志善業白佛言云何天中天開士大士心潔淨佛言所作功德轉增稍上心無所礙功德悉逮是心淨潔過應儀緣一覺上用是比相行具足知又有來供遺者不起喜一切無慳於深經說未嘗有厭深入智中若餘處欲聞經者持是明度爲說之其有餘道所不正者持明度爲正之經中所出

法悉持無常之事以語之諸世間經書所不能解者持是明度爲解之用是相行具足是故弊邪稍稍來到其所便於邊化作八大地獄中有諸開士便指言斯人皆從前佛受決爲不退不轉今皆墮地獄中佛爲授若地獄

潛八

七

耳若當疾悔之言我非不退轉設若言爾者不復入地獄中當生天上佛言設是心不動者知是不退轉用是相行具足知邪復化作師被服徃至其所若前從我聞所受悉棄之皆不可用若疾悔之隨我言者我日來問訊不用我言終不復來莫復說此事我不欲聞前說皆外事耳更受我言是佛所說也佛言聞是設令動轉者當知其人不從過去佛受決未升大士舉中在不退轉地設令不動轉念是經虛空所致作是思惟不信邪言譬如

比丘得應儀不受邪言眼見經證是爲空所致終不可動如應儀緣一覺所念法終不復還是大士向佛亦然矣正在不退轉地立是爲極度用是相行具足知弊邪復徃到其所更作異人言若所求者爲求苦耳非求佛法也若負斯難用之爲求若在惡道歷世彌久適得爲人不嘗思惟自患厭邪當於何所更索是軀如何不早取應儀用佛爲求乎佛言設不轉者邪復捨去更作方便化作若干開士在其邊立復徃指言若見是開士皆供養如恒沙佛衣食卧具醫藥具足受法問慧當所行所求悉學如法住如法求皆入中作斯學行尚不得佛汝緣得乎佛言設是不動者邪去不遠化作比丘輩言是應儀過世時皆求開士道取應儀已若何從得佛佛言用是

故開士大士作是行從他處聞心不轉不異
於是中復覺知邪爲佛所語無異求大明植
志若茲者設不得佛佛語爲謬佛語不欺當
作是學當作是求諦護是教心不動轉從中
覺邪用是相行具足知是不退轉矣又邪嬈

潛八

言佛如虛空是經行無邊不可得極何以故
是經義可知觀其所趣皆虛空矣爲中勤苦
不當覺知邪事邪作是經耳云何欲得佛是
非佛所說佛言夫賢士女視明慮長諦議自
議妖邪多巧以逆爲順恠來不傾牢如須彌
用是相行具足知是不退轉也作一禪二禪
三禪四禪是定隨是四禪不錄禪是所禪作
是定用入欲中故不退轉開士大士不隨定
教淨過定上用是相行具足知又有共稱其
名德者不以喜心不動亂常正心設在家不

有重婬若時有欲如過大空澤中飲食時恐
怖畏盜賊欲疾去自念我何時當出是空澤
中念婦人惡露不淨非我淨法當作是念何
以故念使十方人安隱故佛言如是其福具
足得明度威神力使作是念用是相行具足

潛八

知又和夷洹翼從防衛餘鬼神不敢附不失
心志不妄起心身無瘡癘六情雅具聖雄而
不自顯不誘他婦女若符呪藥不行之亦不
教人婬泆穢行不以歷口非法惡念無由生
哉用是相行具足知復次善業將以何行名
爲不退轉不退轉者不與無道主佞嬖臣賊
盜偷冠軍謀殘生非法士女蠱道婬泆錢穀
屠酒祀繒綵香熏倡伎調戲入海投難求榮
採利如斯之徒終始不友開士從事不離一
切智常譽賢者以爲談首遠愚近聖尊戴三

寶爾故誓曰不退轉開士常願生異方佛刹
願高誓重必獲往生用是故常見佛得供養
如是願從欲處色處空處從彼來生中國於
開士家大明卿八正談於義典逆事不豫遠
邊地無佛處性淨真不犯法如是相行具足
知爲不退轉不退轉開士不言我是不疑我
非不中疑譬如得溝港道於其地終不疑邪
事適起即覺知寧殞命而不迴心自於其地
終不疑不懈無應儀緣一覺心心不念佛難
得安住其地心大表遠勇而無勝何以故如
是住無能過者用是故邪愁毒便化作佛身
往謂之曰若於是可取應儀證若未受無上
正真道最正覺決何以故若不得是相行何
因得乎知非佛也是邪耳如佛所說思惟視
之是邪所爲欲使我轉佛言設不動者知已

於過去佛受無上正真道最正覺決其悉知
法行忠正者代不惜身命一切法悉受往古
來今諸佛明法悉護持之用是故不惜身命
未嘗懈無厭時如來及諸弟子說經時不疑
言非何以故逮得無所從生法樂於中立持
是功德悉具足知是不退轉開士大士

恒竭清信女品第十六

善業白佛言不退轉開士從大功德起當爲
說明度令入深法佛言善哉善哉若內開士
使入深法何等爲深空爲深無相無願無識

潛入

十

無生滅泥洹是爲限又白佛言泥洹是限非
是諸法佛言諸法甚深色痛癢思想生死識
甚深何等爲五陰甚深如本無爾故甚深善
業言難及天中天安稍去色便爲泥洹佛言
是與明度相應當作是住如明度學開士隨

是行思惟念一日如中教却幾劫生死佛言譬如姪士寶彼女色與之期會女不自由決夫寧有盛想不善業言士以色故想彼面會展其愚情佛言一日之中有幾意念對曰甚多天中天佛言如彼人念一日心轉多開士如是欲學淨行一日爲却惡於罪甚多若離明度正使布施如恒沙劫不如也又使壽如恒沙劫等并前行溝港頻來不還應儀緣一覺至佛不得明度行不如中教皆不如此行如中教開士又復壽如前布施持戒具足若求明度念起說經其德出彼上以經布施作無上正眞道自深入教其德轉高自深入者爲明度所護未嘗離時其德甚多善業問佛所識有著者天中天此二何功德爲多者佛言開士所識若求明度樂於無所有樂盡樂

無常念是爲不離明度其德不可計稱數善業問佛不可計復言稱數將有何異乎佛言稱數者其數無盡不可計者謂無邊量也爾故爲不可計稱數善業言佛說不可計五陰亦然佛言若所問者有所因使五陰不可計量善業問佛何等爲無量佛言於空中計之是法不可計佛言云何善業我不常言諸法空對曰如是天中天如來所說悉空佛言如是諸法悉空不可計盡經慧無有各爲異流如來但分別說耳不可盡量是空是相是願是識是滅度隨所喜說作是說示現教化如來如是善業白佛言難及天中天經本空耳云何復於空中說經是經不可逮如我了佛諸法不可逮佛言如是諸法不可逮計法空耳如佛所說本不可逮願解不可逮慧有增

有減佛言不也善業言不可逮慧不增不減
六度等然若其不增何因開士近無上正真
道得爲正覺設不減者開士求守明度變謀
明慧不念布施增之與減不作是念是但名
布施度無極耳所施與念持是功德與作無
上正真道戒忍辱精進禪皆如是開士求明
度守之得變謀明慧不作是念增減皆但名
耳念發心如無上正真道我作是施與何謂
無上正真道佛言本無是也本無不增不減
常隨是念不離爲近矣善業問言開士以初
意近無上正真道耶以後來意近乎斯兩意
無對何等功德出生長大之者佛言譬如燈
炷然用初出明燒炷乎後來明耶善業言非
初明亦不離初明非後明亦不離後明佛言
如是不用初意得無上正真道亦不離初意

非後意亦不離後意得是爲得正覺云何心
前滅後復生乎善業言不也天中天云何心
初生可滅乎對曰不可云當所滅者寧可使
不滅乎對曰不可佛言寧可住本無乎對曰
欲住本無當如本無住佛言設令在本無中
住寧可使久堅乎對曰不也本無甚深曰本
無寧有心也曰離本無寧有心乎對曰不也
曰見本無乎對曰不見作是求爲深求乎對
曰不也天中天作是求無所求何以故是法
了不可得見佛言開士大士求明度爲求何
等對曰爲求空求空爲求何等爲求無相曰
爲去相乎對曰不也云何相不去善業言開
士不作是求亡相天中天何以故開士求相
盡滅者即可得應儀開士變謀明慧不滅相
得證向無相隨是教矣驚鷺子謂善業有三

事向定守定門空不願無相是爲三有益於明度不但晝益夜於夢中亦復益何以故晝日夜夢中佛說等無異善業語鷺鷥子若開士晝日有益夜於夢中亦有益又問夢中所作寧有所得不如經等之善業曰夢中作善者喜爲益惡者慍感爲滅設於夢中殺人覺已喜歎快之云何善業言心不苦爾皆有所緣若見聞若念爲因緣是故知耳從是中令人心有所著或無所著是爲不妄爾皆有所緣鷺鷥子言所作爲空耳何因心有所緣善業言心想因緣四因緣興矣鷺鷥子言開士夢中布施持是施與作無上正真道有施與者無也報言彌勒開士近在前旦暮當補佛處子欲知當從問鷺鷥子問彌勒彌勒言如我字彌勒當色解慧耶當痛癢思想生死識

潛八

十三

解乎持是身解乎若空五陰解五陰空無力當所解法不見亦不見當所解人得道者鷺鷥子曰所說爲有證不答曰我所說不得證鷺鷥子便作是念彌勒所入慧甚深甚深何以故行明度已來久遠佛言云何見若作應儀不乎曰不也天中天佛言開士不作是念我受決是法若於法中得正覺亦無得正覺者作是行爲求明度不恐我不得正覺隨是法中教是故勇無所畏至大劇處虎狼中念設有噉我者爲當布施行布施度無極近無上正真道願我作佛時令我刹中無禽獸道至賊中設於中死心念言我身會當棄捐設殺我我不當瞋恚爲具足行忍辱度無極近佛道我作佛時令我刹中無賊盜至無水漿處心念言人民無德使爾我作佛時令我刹

中人民皆得一切智八味水用一切故當精進至穀貴處念當精進取佛願曰吾作佛時令我刹中無穀貴處皆使人民在所願所索食悉在前如忉利天上所有用衆生故當精進有惡歲正使身遭惡歲死我心無異必當

潛入

十四

降伏邪官屬行精進索佛道我作佛時令我刹中人民無惡歲死亡者我所語後我作佛時無異復次鷲鷲子開士聞是便呼無上正真道或却後久遠乃得佛者亦不恐怖從本際以來呼如一意轉頃何以故無本際乃得佛者心安然不恐怖時有清信女從座起前至佛所禮長跪言我聞是不怖必除恐怖之處索佛道得佛已當說經佛笑口中金光出清信女即持金華散佛上佛威神故華不墮地阿難從座起更整袈裟前爲佛作禮長跪

言佛不妄笑既笑當有所說佛語阿難是恒竭清信女却後當來劫名星宿中有佛名金華是清信女後於此時棄女爲男後當生無怒佛刹從一刹生一佛刹譬如金輪聖王從一觀遊一觀從生至終足不蹈地是清信女

潛入

十五

如是從一佛刹到一佛刹未嘗不見佛足不蹈地自致得佛阿難心念如無怒佛刹諸開士會者是爲佛會耳佛即知阿難心所念曰然阿難諸會者悉度生死已清信女後作佛名金華佛度不可計應儀令三毒盡刹中無禽獸賊盜斷水穀處病瘦及餘惡事悉無有又問佛清信女從何佛作功德佛言於錠光佛所作功德初發意求佛時亦持金華散佛上願持是功德施與作無上正真道佛言如我持五華散錠光佛上即逮得無所從生法

樂於中立佛即授我決却後九十一劫若當
作佛名釋迦文是清信女爾時見我從佛受
決其心念我當受決得無上正真道阿難白
佛言是清信女所求已度

守空品第十七

善業白佛言開士大士行明度無極何等爲
入空爲空定佛言色痛癢思想生死識空觀
一心作是觀不見法於法中不作證佛所說
不於空中作證云何開士於定中立而不得
證佛言是開士悉具足念空不得證作是觀
不取證觀入處甫欲向是時不取證不入定
心所著不失開士法本不中道取證何以故
本願都護衆生爲興弘慈念具功德不中取
證開士大士得明度證致大功德斯大力矣
譬如人勇悍能却敵爲人端正猛健無所不

能悉持兵法六十四部悉曉習攻爲衆人所
敬所至處無不得力者從是所得者轉分布
與人其心歡喜若有他事與父母妻子俱去
過大劇道其人安親曰莫有恐怖今得免難
矣重讎雖來其人多變以濟親害送歸本土
宗門康休心亦無損所以然者以其巧變備
矣其人勇慧能幻化作士衆讎都恐懼各自
流散鄉土稱德靡不歡喜者是開士大士所
於衆生行大慈心過應儀出緣一覺地去於
定中立於衆生悉慙傷無所見於是中不取
證入空中深不作應儀作是行向定泥洹
門不有相不入空取證如鳥飛行虛空中無
所觸礙如是行甫欲向空至空向無相至無
相不墮空無相中悉欲具佛諸法譬如人攻
射射空虛中後箭中前箭續後射轉中前箭

潛八

十六

其人欲令箭墮爾乃墮如是行明度爲變謀明慧所護自於其地不中道取證墮二道行以是功德逮得無上正真道成滿便得佛於經本中觀不取證善業白佛言慊苦作是學不中道取證佛言悉護衆生守定向滅度門心念分別何等爲分別守空定分別無相定分別變謀明慧護使不中道取證何因變謀明慧護之心念護衆生持是所念不中道取證復次深入觀苦空定向滅度門用是故分別久遠已來人民所因緣想中求無上正真道爲說經當使棄是因緣守空是無相定無願定向滅度門不中道取證復次開士念久遠人民呼常有想有我想有好想各各求我作無上正真道時有人民故爲說經使斷是諸想悉斷求云何斷是常非常是樂皆苦是

身非身是好皆醜開士思念爲變謀明慧守無願定向滅度門不中道取證若開士大士心念衆生從久遠來求因緣求想求欲求聚想求空想求開士言我使衆生無斯想普慈弘至故得變謀明慧是法觀空相願識無所從生齊限不中道取證法當作是知開士云何求明度曉習法中心何緣求入守空定向滅度門守無相無願無識無所從生定向滅度門是開士不得慧故守空念無相無願無識無所從生念定竟有來問者不即持不可計心爲解者如是非不退轉開士也何故不退轉開士心無央數悉知用是行不具足知未得不退轉之明矣善業言不可計人求開士道少有能解者佛言作是解者已受決於功德中極殊所知法應儀緣一覺諸天人鬼

龍質諒神所不能及
大明度無極經卷第四

大明度無極經卷第五

潛九

吳月支優婆塞支謙譯

遠離品第十八

佛告善業夢中開士大士不入應儀緣一覺地亦不教人入中諸法夢中視心志常在佛

潛九

當知是不退轉相夢中與若干百千弟子共會坐說經與除饑衆相隨最在前如來說經悉見是不退轉開士相夢中在虛空中坐爲諸除饑說經還自見七尺光自在變化於餘處所作爲如佛說經夢中不恐怖不畏難若見郡縣其中兵起展轉相攻水火之災虎狼師子毒虫之害見斬人首者如是餘變勤苦困窮飢渴者觀諸厄難悉作是見其心不恐寤即起坐念如夢中所見觀是三處我作佛時說經徧教當知是不退轉相何從知是開

士大士成作佛時其境內一切無惡正是時夢中若見畜生相食人民疾疫其心稍稍生念使我界中一切無惡用是故知於夢中寤已若見城郭火起時便作是念可於夢中可見是相見之不怖用是相行具足是爲不退轉開士今我審應是所向者當無是異變火起當滅悉當消去不復見佛言假令火即滅知已於徃佛受尊決矣假令火不滅知未受決設火神燒一舍置一舍復越燒一里置一里知其家人前世時斷經所致斯人之等所作悉自見宿所作惡於是悉除從是來斷經餘殃悉盡知是未得不退轉用是視持是相當爲說令知之或時男女爲鬼神所取作是念或我受決已過去如來授我無上正真道所念悉淨却應儀緣一覺心會當作佛十方

現在諸佛無不知見證者今如來悉知我所識念鬼神當用我故去不去者未受決佛言其人審至誠者弊邪往到前曰若本作是住本字某已受決欲以是語亂之開士言我真已受決者鬼神即當去邪神念曰我當使鬼去鬼即去所以然者天邪極尊有威神力鬼不敢當開士反念用我威神故去耳便自貢高輕傷賢人無所敬錄言我於過去如來所受決已自可貢高反起瞋恚更生罪念當墮惡道以不成爲成當覺邪爲捨善友去爲邪所固當覺是事邪反覆往說昔受決事并七世父母中外宗家姓字若在某國縣鄉生今作是語前世亦作是軟語隨其人性行聰闇吉凶窮達貴賤貧富因扶獎踈言若前世亦爾開士心念想我將爾邪復言若已受決得

潛九

二

不退轉其人聞之心大歡喜自謂審然便行形調輕傷同學用是字故便失其本行墮邪網用受是字故不覺邪爲自謂得無上正真道邪復言若作佛時當字某聞是名心念言我得無然我生本有斯志佛言是開士於智中少無變謀智慧乃作是念若邪天共作是除饑爲之所迷佛言我所署開士不教令作是念遠離一切智亡權德遠大明釋賢友信凶愚斯輩會墮兩道若後久遠勤苦乃復求佛耳用明度慧故當自致作佛佛言是爾發意受是字時不即覺悔如是當墮兩道若有除饑教重禁四事法若復他事所犯毀是禁不成沙門不爲佛子是壞開士言我於某國郡縣鄉生作是念時於除饑四事法其罪最重置是四事重法是爲五逆當意生念受其

潛九

三

字意信之其罪大重當作是知用是字故爲邪入深罪邪復往作是語遠離法正當爾如來正覺所稱佛語善業我不作是說遠離教開士大士於樹間閑處止善業白佛言云何天中天何所復有異遠離佛言正使各有應儀隨是行念緣一覺隨是行念各有開士大士於城外行遠離一切惡不得犯若當於獨處樹間閑止了行開士大士法我樂使作是行不使遠行到絕無人處於中止持是遠離當晝夜勤行是故言行遠離當於城傍我所說法如是爾時弊邪當往教行遠離法語之若當於獨處樹間止當作是行隨邪教便亡遠離法邪語之言道等耳應儀緣一覺等無異佛言是開士所願未得反隨其行於法中未了反自用輕餘開士自貢高誰能過我者

輕城傍明淨心所念不入應儀緣一覺法中住所有惡不受禪脫棄定於定中逮得所願悉具足度佛言其無變謀明慧開士正使在空澤中禽獸羅刹所不止處百千萬歲復過是不知遠離法會無所益邪便飛行在虛空中立言善哉善哉是真遠離法如來所說正當隨是遠離行疾得無上正真道是人聞喜便起到城傍遠離成就有德高行反輕言若所行法非佛言如是諸行者中有正行呼非反行呼是不當敬者而敬之當所敬者而志慢之邪語是開士言我行遠離有飛人來語我言善哉善哉審是遠離法正當隨是行我故來相語若在城傍行誰當來語若佛言開士有德人而反輕之如是當作是知如擔死人種無所中直反呼是開士有短是爲開士

怨家厭開士高行爲天人大賊正使如沙門
被服處開士之中由亦是賊無與從事交接
言笑何以故多瞋恚怒起敗人好心當作是
知所當護法當自堅持當淨其心立心所狎
習當諦持常當正心畏怖勤苦處無得入彼
壞器輩所在三處止常當持慈心哀念令安
隱慙傷之自護所念使吾無生穢濁惡心我
設有不善疾使棄之是開士大士所行極上
當作是知

善友品第十九

復次善業開士大士盛志欲得無上正真道
最正覺當與善友從事恭敬三尊善業問善
友當何以知佛言有爲人說明度無極者教
人入是定是開士大士善友六度無極是善
友是善德是護是將是去如來最正覺當來

今現在十方無稱數佛刹如來皆從明成一
切知道用四事護衆生何等四一者布施二
者勸樂三者饒益四者等與是爲四德爲父
母爲舍爲臺爲度爲自歸爲導是故六度爲
衆生之度開士大士學六度用衆生故都欲
斷其根學明度相何所是明度相無罣礙明
度相是相爲得諸法佛言如是無有相得明
度是所相得諸法何以故諸法各空是相亦
空是爲明度善業問佛正使天中天諸法各
空何緣人民欲生死滅盡時空無增時亦無
休息各虛空無形無上正真道最正覺不從
是中各各虛空不得無上正真道最正覺云
何天中天是法當何以知決佛言爾群生勤
苦望欲得是因致是作是求爾見我得空不
乎善業言不也天中天佛言自作是得是是

空不對曰如空天中天佛言但用是故若無解時對曰如是天中天極安隱人民欲得是因致是勤苦無休佛言人民所欲故便著當作是知人民所生本從是生從中無所取無所取者不作是無是無滅盡時無生增益者作是曉知是開士大士求明度善業白佛言開士爲不求五陰作是曉知爲求明度爲悉等求諸應儀緣一覺所不及有德之人求魏巍之道無能逮者當作是行晝夜疾近無上正真道最正覺佛言云何四天下群生都獲爲人常求無上正真道發意索佛道各盡壽布施與無上正真道於善業意云何其福寧多不對曰甚多天中天佛言得明度淨定守一日如中教作是念行其福過彼何以故衆生行無能及是慈者斯高士深入智中曉了

是智悉具足是世間勤苦即興普慈愍傷一切道眼徹視見群生成就具足高志行無懈怠以其不懈得是彼開士弘慈普至不以斯相住亦不用餘住其智大明雖未作無上正真道一切刹土皆共尊舉正上真道終不還若受供養衣服飯食牀卧醫藥是明度心中立所受施除去近一切智所食無罪益於衆生悉示道徑無邊極處悉明照之諸在牢獄中者悉度脫之示其道眼隨是行莫念想莫作異念持經入明度中高行莫懈譬如得明月珠已復亡之大愁毒坐起憂念想如亡七寶作是念云何我亡是寶欲索珍寶者常堅持心無得失一切智何以故明度虛空亦不增減善業言虛空云何開士大士成就其行近無上正真道佛言開士大士亦不增不

滅經中說時聞之，不恐不怖，當知是高士即爲求明度矣。善業言如是，明度是爲空求乎？佛言不也。有離明度得耶？佛言不也。善業言以五陰求佛言不也。又問離五陰頗有所求？佛言不也。善業言云何求？大明佛言若見是

諸九

七

法何以法求明度？對曰：不見天中天。佛言云：何徧見是明度？何所開士求之？對曰：不見佛言，設使徧見法有所生處，不對曰：不見佛言。是所開士大士逮得無所從生法樂，悉具足無所受。決無上正真道最正覺所至處，無所復畏，悉作是護，是求是行，是力爲逮佛慧。極大慧自在，慧一切智慧如來慧，設作是不得。佛言爲有異善業言，設使諸法無所生受，決無上正真道。佛言不也。善業言云何開士大士得無上正真道？佛言見所當受決者乎？

對曰：不見法當作無上正真道。佛言如是，諸法無從中得。開士不作是念，持是法當受決，不受決。

天帝釋品第二十

釋於衆中白佛言：甚深明度無極難了，難知。天人德大，值說斯定聞之，書持學者其福甚大。佛語釋闍浮提人民皆持十戒，悉具足持，是功德百千萬億倍，不如是善人聞明度書，持學者時坐中有一除，謹語釋出，卿上去已，報言持心一念出我上，何況書持學隨是法。

教作是立者，明德巍巍踰三界群生之上，乃至溝港頻來，不還應儀緣一覺，復過是上。至開士行布施持戒忍辱精進禪度無極，若失明度及變謀明慧亦復過其上。開士大上求明度，狎習中行天人鬼龍含毒凶孽終不能。

勝作是堅持疾近一切智不離如來名佛坐
不遠懈怠不生爲學佛不學應儀緣一覺法
四天王當往問訊疾學四部弟子當於佛坐
作無上正真道當作是學四天王常自往問
訊何況餘天子阿難作是念是釋自持智說

潛九

耶持佛威神說乎釋知阿難心所念語阿難
言持佛威神佛言是中阿難或時開士大士
深念求學明度三千國土中邪一切皆悉愁
毒欲共壞亂使中道取證

貢高品第二十一

佛告阿難開士隨時各學明度無極隨法行
之是時一佛界邪各驚念言我使開士中道
得應儀莫使得無上正真道弊邪見開士習
行明度深爲愁毒四面放火怖諸開士令心
一轉佛言邪不身徧行亂開士若遠離善師

爲邪所亂愁毒以不深解明度心狐疑念有
之無乎昔所翫習而今惡聞或結不知將以
何緣守明度乎疑網自弊邪得其便教餘開
士言若用是爲寫學我尚不了其事若能了
乎自言所行是若所行非所爲顛倒用是故

其人在地獄禽獸餓鬼中其罪日增如是邪
大歡喜若開士與行應儀道諍又與開士共
諍時邪言而離佛遠矣若未得不退轉開士
與不退轉諍隨念恚恨心一轉念轉却一劫
雖有是惡不捨一切智劫數無極始當從初

潛九

九

發意起阿難白佛言心所念惡寧可悔不可
當却就爾所劫佛言我法廣大可得悔若開
士念惡有恨又喜以教彼斯人不可使悔也
設有恚詈即慚悔過我當爲十方人作橋梁
令得泥洹寧可有惡意與人諍耶當如啞羊

諸惡之人忍心不當起恚爲應儀道者阿難
白佛言開士大士與相共止法當云何佛言
相視當如視佛心念當言共一師一船一道
彼所學我亦當學欲喜應儀緣一覺道者不
與同願其有忍苦欲求佛者當與相隨若此
爲一法學也

學品第二十二

善業白佛言開士學無常爲學一切智學無
所生學去姪姪學滅度爲學一切智佛告善
業若所問學無常爲學一切智者云何是如
來本無隨因緣得如來本無字寧有盡時不
對曰不也如此爲學一切智明度無極如來
地十種力四無所畏爲悉學諸佛法開士大
士作是學邪及官屬不能中壞疾得不退轉
爲近佛樹下坐爲學佛道爲學習法慈悲喜

護普濟群生學三合十二法輪爲轉學滅度
十方人爲稍稍上至佛道學入甘露法門不
懈怠之人乃能學是作是學者爲學十方人
導死不入地獄禽獸餓鬼終不生邊地愚癡
貧窮中不受衆痛之疾不毀十戒不從流俗
淫祠遠不持十戒人不願生不想天上從明
度中出變謀明慧威神入禪不隨禪不隨禪
法開士學如是爲得淨力無所畏佛法淨
力善業白佛言諸法本皆淨何等開士爲得
法淨佛言開士學如斯爲學無所得淨法諸
法淨如是開士行明度時不悔不厭是爲行
潛九
未得道者愚癡不曉是法不見其事開士用
人故常精進人當効我用是得力精進無所
畏作是學一切智者若出金之地其地少耳
又如索轉輪聖王之人少耳小王者多從是

中多索應儀緣一覺者既有初發意開士少
有隨明度教得不退轉者開士當力學及不
退轉開士行明度不以慧意向人不求人短
心無慳貪不毀戒懷恨懈怠迷亂心無癡冥
學明度爲照明諸度悉入其門道德備足如
人言是我所便外著十二品悉供養一佛界
中人盡壽命不如守明度淨定彈指頃何以
故從是疾得無上正真道能給施十方窮孤
求佛境界佛之智慧如師子獨步欲得佛處
當學明度學明度者爲學諸法善業言開士
復學應儀法耶佛言開士學一切智應儀功
德不於中住開士學十方人無能過者於一
切智中不增不減若念持是明度當得一切
智爲不行明度無極無想之行也

守行品第二十三

是時天帝釋在會中坐作是念開士行十方
人無能過者豈況佛乎人身難得壽安又難
有一發意求佛者甚難何況至心求佛道欲
爲十方作明度導者乎是時釋化作甘香華
以散佛上作是說行開士道者乃及於佛所
願悉成爲護成佛諸經一切智如來經法悉
具足不退轉法示人有至心索佛於是法一
存念終不還我欲使人於法中益念不厭生
死之苦以一切衆生苦故當忍勤苦之行心
作是念諸未度者吾當度之恐怖者吾當安
隱之諸未滅度者吾當滅度之復問佛新發
意開士隨次第上至不退轉至一生補處人
勸助其喜得何等福佛言須彌山尚可稱知
阿閼浮開士行人勸助歡喜其福無極一佛
界中海水取一髮破爲百分從中取一分以

取水水盡可知幾滴不退轉開士行勸助歡喜其福不可量稱數一佛刹虛空持一斛半斛一斗半斗一升半升可量知幾所此勸助福不可極釋白佛言邪及官屬從邪天來聞斯定不勸助將有緣乎佛言發意索佛者爲壞邪界心不離佛法除饑衆如是其助喜者爲近佛用是功德世世所生爲人所敬養未嘗有惡聲不恐入三惡道當生天上在十方常尊何以故此勸助之德爲等施群生矣何以故初發意人稍稍增多自致作佛滅度群生故善業白佛言心譬如幻何因得佛佛言云何若學見幻不對曰不見化幻亦不見幻心也佛言不見化幻幻心見有異法當得佛道不對曰離化幻心不離幻心不見當來佛無法無見當說何等法得耶不得也是法本

無遠離亦無若得不得也本無所生亦無作佛者設不有是法亦不得作佛善業白佛言設爾明度離本無對曰法本無對無證無守無行無法當有所得何以故離明度本無形故本無遠離何因當於明度中得佛佛者離本無所有何所離本無所有當得佛者佛言如爾所言離本明度離本一切智俱無所有雖離本本亦無所從生開士當作是惟深入守定是故離本無所有得作佛雖知離本無明度無所有是爲不守明度不具足行者不得作佛如善業所言不用明度故得佛雖爾不可離明度得作佛開士所行勤苦深奧之法不可取泥洹如是所說事開士不爲勤苦行何以故無作證者無明度得證者亦無經法得證者開士聞是不恐不怠是爲行明

度雖作是行亦不見行是爲行明度近作佛
遠離應儀緣一覺不見不念譬如虛空中無
念有近遠者也何以故明度無形類譬如幻
所作人不作是念師離我近觀人離我遠譬
如影現於水中或近或遠不念近遠何以故

潛九

十三

影無形明度如是無是念應儀緣一覺道爲
遠佛道爲近適無憎愛無著無生譬如匠工
黠師刻作機關木人若作離畜不能自起居
因對搖木人本不念言我當動搖屈伸低仰
令觀者喜如海中大船作者欲渡賈客船不
念言我當渡人如曠野之地萬物百穀草木
皆生其中地不念言我當生不生也如明珠
悉出諸寶如日照於四天下其明不言我當
悉照如水如風無所不至不念當有所至如
須彌山上忉利天爲莊飾山不念我以忉利

天爲莊飾若大海悉出諸寶奇物海不念當
從中出珍寶明度無極出生諸經法如是雖
爾無形無念譬如佛出生諸功德慈悲喜護
加諸群生明度成諸淨法其義亦然
強弱品第二十四

鷺鷥子問善業闍士大士行明度無極爲高
行耶報言我從佛聞行明度爲無高行諸愛
欲天念當爲十方發意爲闍士導者作禮何
以故行深明度闍士誓忍衆苦究竟佛業不
中取證寂滅度矣善業語諸天雖不墮落中
道取證是不爲難也爲十方衆生被法鎧令
得滅度斯乃爲難斯人本無索不可得作是
念爲欲度十方欲度空何以故虛空無近無
遠人本亦爾欲度人爲度空爲被法鎧如佛
所說人本無其知人本無所有是爲度人開

士聞斯不恐怖斯爲行明度離人本無人離五陰離諸法本無五陰及諸經法開士聞是不恐不懈佛言何因不恐不懈對曰本無故不恐本淨故不懈何以故索懈怠本本無有也所因懈怠亦復無有也諸天釋梵皆爲作

潛九

十四

禮佛言不但諸釋梵上至約淨天徧淨天無結愛諸天皆爲作禮十方不可計現在諸佛悉念擁護知是行明度開士不退轉恒沙佛刹中人悉使爲邪一邪者化作如恒沙官屬欲共害不能中道壞得其便有二事法行明度邪不能中道得其便何謂二事一者視諸法皆空不失本願二者不捨十方人諸佛悉護視諸天徃至開士所問深經讚歎善之令作佛不久當隨是教法立諸困苦者皆得護未得自歸者爲得自歸爲人故作法舍無目

者得慧眼佛語善業譬如我讚說羅蘭那枝頭佛十方諸佛亦讚歎行明度開士如是佛言有行開士道未得不退轉者亦復讚歎善業問佛行開士何道爲佛所歎佛言開士隨無怒佛前世爲開士時及羅蘭那枝頭佛前

世爲開士時所行隨是教用是故十方諸佛讚歎之開士大士行明度諸經法信本無所從生尚未得無所從生法樂於中立信諸法本空如滅度尚未獲不退轉隨是法教立者疾得不退轉有應是法行者諸佛讚歎之是

潛九

十五

開士爲度應儀道正向佛道地開士聞深明度信不狐疑念如佛說諦無異也却後當於無怒佛所聞是法爲在不退轉地立若聞者其德甚大何況隨法教立者爲疾入一切智善業白佛言設離本本無法無所得亦何所

法有作佛者有說經者佛言如是設離本無法無所得何所法有作佛者亦無說法者是本無無本何所有於本無中立者釋白佛言明度甚深開士勤苦行乃自致成作佛何以故無字法無所得在本無中立者亦無作佛者無說經者聞是不恐怖不疑不厭善業言如是帝釋開士勤苦聞是深法不疑不厭諸經法皆空何所有疑厭者釋言如所說一切爲談空事爲無著譬如射空也善業所說經猶亦然矣釋白佛如我所說爲隨佛法教耶有增減也佛言與佛說無異如善業所說但說空事善業亦不見明度不見行者行不見佛不見得佛者一切智如來無所從生法十種力四無所畏上尊諸淨法都不覩有索得之者所以然者諸法本淨故爲無得斯爲行

明度也衆應儀緣一覺地所不及欲爲十方人天尊當隨佛法教立是時忉利天上數千萬天化作甘香華散佛上作是說言我曹亦隨法教時座中百六十比丘起整衣服爲佛作禮已手中各有化甘香華持散佛上言我曹亦當隨法教立時佛笑口中出若干色光其明至十方佛國悉爲其明還繞佛三匝從頂上入阿難從座起整衣服爲佛作禮長跪問佛佛不妄笑願說笑意佛言是百六十比丘及諸天甫當來世有劫名導是比丘及諸天當於導劫作佛皆同一字字優那拘泥摩作佛時比丘僧數各等其壽二萬歲隨次作佛壽各等盡散五色華如是

累教品第二十五

佛告阿難作是立者爲如佛立欲如一切智

立當隨明度教應是行者當知從人道或從
兜術天上來久聞明度或行所以然者佛滅
度後法於世間現或於兜術天上現有行若
書者復轉教人勸樂合偶知供養若干佛已
來不於應儀緣一覺品中作功德有受明度
學之若解中慧是開士如面見佛無異其有
斯德用求應儀緣一覺會必得佛矣行法常
當遠離此二道佛語阿難持是明度囑累汝
我所說餘經若所受悉捨忘之其過少耳所
從佛受明度若忘捨之其過甚多諦學悉具
足受書字莫令缺減往古來今佛經等無異
若有慈心於佛者當受此法敬禮供養爲供
養三世佛報佛恩備矣若慈孝於佛不如恭
敬明度慎莫忘失一句囑累若麤誦說耳若
有不欲離於經法比丘僧三世佛者不當遠

此法三世諸佛皆由斯生所以然夫六度者
乃諸開士大士之母佛不可盡經法之藏若
日教人盡佛界中令得應儀道雖有是教尚
未報佛恩不如具足爲開士說明度雖不能
多一日可不能一日食時可若須臾間其福
勝廣爾所應儀開士大士思惟中慧得功德
出應儀緣一覺上會當得不退轉不中道墮
落說是明度時四部弟子及諸天王諸鬼神
王一佛界中持釋迦文佛威神一切悉見無
怒佛及比丘應儀諸開士亦無央數忽不復
現佛語阿難譬如見國中人已不復見無怒
佛及諸開士應儀士諸經索不見亦如是法
不見法法不念法何以故諸經法無念無見
亦無所益佛語阿難諸經法皆空無所持不
可念譬如幻師化作人諸經法亦然無念無

痛何以故無形故開士作是行作是學爲行
學明度在學中最尊百千萬倍是爲安十方
群生困厄者爲隨佛法學也有應是學者以
手舉一佛刹又復著故處人無覺者從是學
成無礙慧法十方三世無數諸佛悉從明度
成佛亦不增不減是故不可盡虛空亦不可
盡

大明度無極經卷第五

音釋

摘才古切粗上
聲物不精也

大明度無極經卷第六

潛十

吳月支優婆塞支謙譯

不可盡品第二十六

是時善業念佛所說明度無極義甚深不可盡譬如虛空開士當何緣思惟之佛言五陰

潛十

十二因緣不可盡當作是惟十二因緣適得其中開士初坐樹下時以不共法惟十二因緣是時一切智慧具足開士行明度時惟十二因緣不可盡者出應儀緣一覺道正住佛道不作是惟者便中道得應儀緣一覺道不中還者用惟行明度變謀明慧故視十二因緣不可盡所視法生滅者皆有因緣法無作者作是思惟十二因緣不見五陰不見佛界無所因法當見佛界是爲開士行明度當爾時邪天愁毒譬如喪親矣善業白佛言一邪

愁餘邪復然乎

佛言一佛界邪各於所止不安開士隨教時應行如是者諸天世凶群生猛毒不能害之欲求佛者當行明度行明度者爲具布施持戒忍辱精進一心變謀明慧若邪事起即覺滅之悉欲得變謀明慧諸度無極者當守明度思惟十方現在諸佛悉從明度出生開士作是念如諸佛悉得經法作是念如彈指頃若有布施具足如恒沙劫不如是行者爲住不退轉地爲諸佛所念終不逮餘道會當得佛不歸三惡道開士未嘗離佛時行當如捷陀呵畫開士捷陀呵畫開士在無怒佛國爲第一

隨教品第二十七

善業白佛言開士何因隨明度無極教佛言

諸經法無能壞者開士隨教當然虛空不可盡五陰四大無形沙羅伊檀六事本空無形開士隨教當然發心求佛願濟群生其願弘普莫與爲倫佛有四事不護各自異端德尊無極開士隨教當然爲衆生作慈護是我所

卷十

二

非我所悉斷之虛空之中音響無形隨教當然譬如大海不可斛量如須彌巔奇寶各異如釋梵各自有教如月滿如日明徧至人本無形但字耳本無所生與滅度等開士隨明度當如幻化及野馬有名無形如地水火風是四事無極佛身相本無色佛界本無界佛諸經法本無無說無教譬如衆鳥飛行空中無足跡矣五根五力七覺意棄脫定足是悉度諸欲臨作佛時乃得行是開士隨教當然諸經法無極量無從生無因出臨作佛時諸

經法悉具足成滅度虛空無所有諸經法淨適無所因佛所作爲變化無極一切無索開士者無得佛者爾乃能度無央數人開士隨明度教當然去離諛諂貢高強梁非法自用財富僥倖世事衆穢棄身不惜壽命適無所

慕但念佛業安慰群生開士行能然者得佛不久悉得一切智功德當字爲佛何以故今得佛不久若有開士以是教甫當來世爲得佛字佛在世若滅度後亦當隨明度無極如是

卷十

三

普慈開士品第二十八

佛告善業開士疾欲得佛者索明度無極當如普慈開士善業言今普慈所在佛言在上方便過六百三十億佛國佛名香積其刹名衆香又言彼何因索明度佛言前世積行功德

追還本願所致前已供養無央數佛時開士
卧出天人於夢中告曰若求大法寤即求之
求之不覩其意惆悵欲得佛聞大明法時世
無佛國無開士所行淨法是故哀慟如人有
過在國王所財物悉沒父母及身閉在牢獄
時忉利天人下觀見開士日日哭知有至心
精進求道天人即於其親屬中學字開士先
是時世有佛名景法自藏來王已滅度久不
覩佛不聞經不見比丘僧時復於夢中見忉
利天人告曰前有佛字景法自藏來王夢聞
佛字則寤寤已大歡喜則捐家入山投命棄
身無所貪慕而大啼哭自念惡所致不見佛
不聞經不得開士所行法是時空中有聲音
善士止無哀慟矣有大法名明度若有守志
行之其得佛疾若當求是法得聞守行者佛

功德身三十二相八十種好若當得之亦當
以經法教十方人問空中聲何緣得聞當到
何方索作何方便空中聲報言從是東行莫
得休息若行時莫念左右前後上下行止莫
念恐怖歡喜食飲坐起行道中止莫念姪怒
癡莫念守行有所得莫念內外五陰眼耳鼻
口身心地水火風空莫念衆生吾我壽命有
空無空有道無道有經無經生天上世間開
士善惡一切念斷適無所著從是東行作是
行不毀者今得明度不久過去諸佛行開士
道求之如此得明度隨其教精進行必早得
佛開士聞之大歡喜言當隨天教報言莫失
此教言畢不復聞聲聞是教則東行適無所
念行道中念曰去是幾所乃當得明度復大
哀慟上方空中有化佛言善哉善哉若所索

得甚難作是精進者今得不久普慈開士又手仰視化佛身金色放十億光焰三十二相心大歡喜叉手白佛言願佛說法我從佛聞皆欲得之佛言受我教法悉念持之諸經法中本無恐懼本淨無端緒住諸經法無端緒無所說住無所說教如虛空無形住如滅度無異無所從生無形住如幻如水中影如夢中所見其等無異佛音聲如是當隨經教植志守淨從是東行去是二萬里國名香淨法王法治處其國豐樂人民衆多其城縱廣四百八十里皆以七寶作之其城七重間有七寶奇樹上有雜寶羅穀惟慢以覆城矣其間有寶交露垂鈴城四門外有無極戲廬繞城有七重池水中有雜種青蓮及諸名華其香熏國光色遐耀行者近華身衣如之皆在池

中生池間陸地有蘆薈華忍中華奇華如是數百種池中有衆鳥鳬鴈鴛鴦異類之鳥數百種有七寶船其人乘船遊戲池中羅列五色幢幡雜色華蓋街巷周徧譬如忉利天帝釋殿懸幡之聲道德爲本晝夜不休聞者行進如彼天上難檀洹戲廬音樂之聲快樂不絕城中皆是開士有成就者有發意者服飾炫煌珍奇無量中有開士字法來衆聖中王有六百八十萬玉女妻諸開士常敬之於國中央施高座隨次轉下黃金座白銀座瑠璃座水精座其上皆布文繡綰綰座間皆散雜種香華上施寶蓋中外周帀燒衆名香法來開士常於高座爲諸開士說明度中有聽有書有學有諷誦守者若到彼所當爲若說之前數千億世常爲若師是若發意時師也往

至佛所時若所聞見慎莫疑怠何以故若未
曉變謀明慧當諦觀邪事善士慎於邪教莫
念師在深宮以之懈怠敬當如佛用經法故
莫念財利無貪爲寶當貢所尊慈孝於師作
是行者今得大法矣開士從化佛聞是教其

喜忘身即見十方佛定諸佛皆遙歎言善哉
善哉善士我曹本求開士道時用精進故獲
明度成爲一切智三十二相八十種好十力
四無所畏四事不護十八不共亦復得定諸
佛所歎若尋佛迹當則吾等作斯行者開士
功德若當具足得之普慈開士從定寤作是
念諸佛本從何所來去何所至作是惟已便
復哀慟念佛教我至法來所便從是去中道
得一國國名邪所樂我於城外園中止宿自
念佛法實難得聞我當盡力供養於師今我

一身加復貧窮無珍寶及香華供養於師作
是念已即入城街里自街言誰欲買我者是
時邪在城外戲與萬婁女共遊邪聞開士自
街聲便念開士自賣身欲供養法來志存索
佛當出我界度人衆多今當壞子令一國人

皆不見其形不聞其聲如是城中人悉不聞
見其形聲開士賣身不售便自宛轉卧地啼
哭呼曰吾賣身以奉師都無買我者當云何
乎天帝釋遙見開士精進乃爾來下試之知
爲至誠索佛道但諛諂乎便化作梵志問言
高士將欲何求勤苦乃爾用何等故宛轉哭
乎報言不須問也又問至三所欲勅使願語
我意念欲相助開士報言我自賣身以供養
師梵志曰吾欲大祀欲得人血肉髓心卿能
與我者我益與卿寶開士聞之心大歡喜即

取力自刺兩臂以血與之復割兩脰肉又破骨以髓與之適欲刺其臂時樓上有長者女遙見大慙傷之與諸妓女五百人下至開士所問言高士年尚幼少端正如是何以故自割截身體乃爾乎報言我出血割肉取髓賣

塔十

七

之以供養師女問設供養師者能得何等師名爲誰在何方止開士報言在東方字法來當爲我說明度聞者當守淨行可疾得佛身三十二相十種力四無所畏四事不護十八不共得法輪轉度十方人女聞之喜曰如所言天上天下無比卿何其自苦乃爾乎我足子名寶身與衆女願從子行供養明度欲聞深經開士言甚善梵志言善哉善哉開士高行精進難及吾非梵志也是天帝釋矣故來試子子欲何求我悉與子報言天王哀我者

使身平復願則如舊瘡愈身強氣力踰前釋即自去長者女語普慈言願見吾親索寶辭去開士親彼女親具陳之親曰甚善吾亦有志傷年西垂體違心願矣若欲所得便自說之女言我欲得珍寶奇物父母言自恣取之女便取奇物織成栴檀名香及雜諸寶五百乘車悉載自重五百侍女自副諸女啓長者女親欲侍貴女隨開士行親許即行以漸進路遙見香淨國七寶城郭幢幡光色衆寶交露鐘鈴樂音寶樹戲廬車步諸妓香風四出譬如天上開士及諸女遙見如斯忻豫無喻念曰吾等宜當下車步行入城共從西門入問路人曰彼何等臺七寶服飾姝好乃爾乎路人曰賢者不知邪有開士字法來人中寂尊無不供養作禮者是開士用明度故作是

臺其中有七寶函以紫磨黃金爲素書明度著函中有若干百種名香法來開士日日供養持雜華名香然燈懸幡華蓋雜寶正音道樂盡禮供養餘開士亦然忉利天人晝夜各三持天名華供養明度普慈開士及諸女聞之大喜俱以雜香金縷織成雜衣有散上作幡搭壁敷地者畢俱至法來開士高座會所相去不遠遙見在高座上爲人幼少顏貌端正光耀徹射爲巨億萬人說明度與法來相見持雜種香若干寶衣以上師矣作禮遶八百帀自歸言願吾等進高行獲尊經法來開士慰勞之曰多賀來到得無疲倦他所勅使所欲得者莫自疑難我是度人之師適無所愛惜普慈開士言我本索明度時於山中哀慟空中有化佛身有三十二相紫磨金色十

億光焰出佛歎我言善哉善哉索明度當爾從是東行二萬餘里其國名香淨中有開士字法來人中寂尊常反覆教人若至彼聞當得明度前巨億萬劫常爲若師斯若初發意時師也我聞師名心大歡喜不自勝用歡喜

故即得悉見十方佛定是時諸佛讚歎我言善哉善哉我曹求佛索明度亦爾自致成佛寤則不見我自念言佛爲從何所來去至何所願師爲我說法來言賢者善聽空無願無相本無所從來去亦無所至佛亦爾無處無所生無形幻化野馬夢中人滅度想像無生無長無所適經界本端無所從來去亦無所至欲知佛亦爾普慈開士聞深法如是比不可量即於座上得六萬定門何等爲定門無處所定脫諸邪中不恐是脫於愛欲之本定

脫出患難定不可計諸法句入定譬若海水不可量多少慧所入定莊須彌山功德莊飾定五陰四大六衰無形觀定入諸佛定悉見諸佛定開士定道諸經無形見說定珍寶莊嚴定悉觀珍寶入定悉念諸佛定開士上高座定真不退轉及法輪爲轉定莊佛功德定所聞衆事無瑕穢悉及淨定所聞衆事如海定無所獲無過定樂經音聲徧至定經法章顯旗旛定如來身無形入定諸經無形徧見定開士印定如來目見定照明境界定佛界所願具足定解十方難定臨成佛莊嚴定種種雜華葉異色定多珍寶定法輪常轉定諸音聲遠聞入要定入十方人本定諸三界悉徧至定成佛諸功德定無能過六度開士樹下坐時定壞餘外道羅網定如來見飛定無

量功德莊嚴定諸珍寶智慧功德定一切智地定悉淨自定悉徧照明定悉入十方人因坻定根智慧出中定三世悉等定如是比普慈開士得六萬定爾時法來開士起入宮中法來開士品第二十九

是時普慈開士安隱從定覺起與諸婬女共至法來宮門外立自念言我用經法故來師今在內外無宜坐卧矣須師出上高座說明度無極爾乃坐矣諸女亦效立是時法來適教中宮諸婬女說經道已沐浴澡洗更著新衣上明度臺坐惟諸定如斯七歲不動不搖普慈開士及諸女亦復經行七歲不坐不卧後天人於空中語之言却後七日法來開士當從定起聞天人語聲自念言我當爲師敷座掃灑令淨皆到說經處特爲師施高座諸

女各取著身衣服敷座上。是時邪自念言：未嘗有是開士。今施高座，用敬索佛，故精進勇健，無休懈時。得道者當出我界度，脫衆生無量。吾當壞子邪惡，壞諸開士座，皆令縹戾。雨沙礫石，荆棘枯骨，汙座普慈及諸女。見地輒沙礫荆棘枯骨，在其座間。自念言：今師當坐說經，及諸弟子皆當來聽我。更掃除整頓坐席，整已地，輒有塵土來。至師及諸開士，今當灑之。即行索水。邪今水竭，念曰：我曹索水不得。當云何當取身血以灑之時？普慈及諸女各取刀處處刺身，出血灑地，用慈於法。故時釋自念言：今世乃有是人，精進恭敬慈孝於師，讚言善哉善哉。賢者誠難及。今聞明度不久，會當得佛。賢者今他所勅，使願相告矣。有如賢者輩，我當護所欲得者，悉當與之。普慈

報言：我欲所得者，自當知之。是時釋化地，悉使作水精瑠璃。其上有金沙，使普慈及諸女身體暴瘡，悉平復如故。座四面化作瑠璃水池，周帀皆有珍寶欄楯，及四寶池，挾陞兩邊有七寶樹，若干百種，行列殊好。開士及女人爲諸開士儲水。天雨衆華，光色耀國，甘香四被。聞者心輒凡。四千石釋上普慈開士語之言，持是華供養明度及散法來。諸開士上以天衣五百領，法來在座，以衣敷上。普慈即悉受之，便爲咒願。是時法來開士七歲已後，從定覺起，到高座與二百億開士共坐於前。坐者甚衆，多是時普慈及諸女，皆共散華并持栴檀、檣香及名雜香，諸珍寶散法來。諸開士上前以頭面著足，起遶三帀，却住以微意視法來。大會方四十里，滿其中人。法來開士四

向視諸來會者用經法故即爲說明度言善
士具聽諸經法本端悉等如來智慧無所罣
礙如幻無形如風本端不可計明度亦然一
切我所悉斷本本淨明度亦本淨譬如野馬
像人本無如夢中有欲其欲本無如所名人
本無如應儀滅度空無所生明度亦然如來
滅度亦等無異明度本等譬如然火則時滅
之本無所從來去亦無所至如夢中見須彌
山本無如佛現飛本無所有明度亦然前於
欲中相娛計之無所有如人名聲無所有如
來無於前見者念所作因見明度念所作本
無所有如幻師化作像本無所有如虛空適
無所住如幻師學無所不示往古來今亦不
可合爲一明度者亦無三世當作是知名計
本無形罷字有形明度無所不至無不入何

以故空本無色明度譬如虛空無不至無不
入入於地水火風空入於彼此五陰入人壽
命有德無德入於欲不欲有無有相無相願
無願入於生中入於日月星宿質諒神龍鬼
王執樂神似人形神曾臆行神蛇軀神亦入
禽獸餓鬼地獄蜎飛蠕動跂行喘息入於貧
賤富貴賢者聖智仙人溝港頻來不還應儀
緣一覺入於開士入於佛入於滅度四意止
四意斷四神足五根五力七覺意八道行有
智無智十種力四無所畏四事不護十八不
共佛經世經巫咒入於宿命所行展轉生死
中有苦無苦自在不自在度脫好不好善不
善智不智明不明往古來今可見不可見教
法所有無所有一切有形無形無不入矣佛
告善業法來開士爲普慈說明度所入處如

是具說晝夜七日。是時人聽經。呼如飯頃。何以故。法來開士。威神力恩。普慈開士。聞大歡喜。諸女共持天衣及八百石雜寶。供養法來開士。釋復持天上名華。以散法來及諸開士。上以增功德。是時一佛界中樹木華樹果諸

釋十

十三

雜寶樹悉傾曲躬。爲法來開士作禮。雨蜜香之華。其華香聞一佛刹中。一切人聞。是華之香。各遙見法來開士在高座上說經。并見普慈及諸女。心皆樂之。柔弱歡喜。皆遙作禮。其國中悉震動。是時巨億萬人。悉得無數經法。不可復計。開士皆得不退轉。時諸女前白。普慈言。我等願以身命。自歸爲師。給使并五百乘車珍寶。以上師師爲我等。忍夫衆苦。以師當佛。今蒙大恩。乃得聞尊經。無絲髮之疑。今我等爲師。給使巨億萬劫。尚未能報須臾之

恩。普慈受之前白。法來開士言。今以身及諸女衆珍寶。以上大師師哀我等。願受之。使我得其功德。法來開士欲使普慈成其功德。故悉受之。反遺普慈言。以是諸女可爲給使。諸車珍寶。可以自給。忉利天上諸天人各歎言。

善哉。善哉。普慈衆寶。悉以施師。是意難得。時有巨億萬人。共到法來所。聽經。普慈歡喜。即於座上得六萬定門。何等爲定。願樂定。威儀定。勸德定。月盛滿定。日光焰定。如來行定。悉念佛定。開士生定。樂智慧定。度脫堅住定。諸境界中。無所住定。國土種種嚴入定。如來相入。無相定。十方人無形印封定。如來出生定。無所畏樂定。棄捐珍寶定。如來力莊嚴定。諸經法明樂定。諸法無所從來解事定。淨如梵天定。三世悉等入定。嚴佛藏定。佛音聲悉成。

定如是定輩得六萬門開士從定覺悉得智
慧力入諸經法中普慈白言願師爲我說佛
聲當何以知之法來曰賢者明聽譬如笙篴
不以一事成有柱有絃有人揺手鼓之其音
乃同自在欲作何等曲欲知佛聲音亦然開

落十

十四

士有本發意累世作功德教授問佛事合會
是事乃得佛身音聲亦然其法皆從因緣起
不從開士行得不離行得不從佛身得不離
佛身得賢者欲知佛身音聲合會是事乃得
佛聲耳復次賢者譬如吹笙師其音調好與
歌相入笙者以竹爲本有人攻吹合會是事
其聲乃悲如來身不以一事二事成以若干
事累世作功德教人入道本願所致用是故
佛身相及種好悉見如是譬如佛滅度後有
人作佛形像端正姝好如佛無異人見莫不

稱歎持華香繒綵供養者賢者謂佛神在其
像中耶對曰不也所以作佛像者但欲使人
繫意禮敬自警修德得其福耳亦不用一事
二事成有金有智人若有見佛時人佛滅度
後念佛故作像欲使十方供養得其福法來

報言如賢者言成佛身不用一事二事有開
士之行有本索佛時人若有常見佛作功德
用是故成佛身智慧變化飛行及諸種好乃
成佛身譬如鼓有竹木韋桴有人擊之其聲
乃出欲知佛身亦爾用若干百千事乃成之

落十

十五

耳有初發意有六度無極行曉知本無無所
從生之事坐於樹下降伏邪官屬諸經法當
知如幻無異以是成佛身譬如畫師有壁彩
筆手畫之乃成畫人佛身亦爾用數千事有
布施持戒不犯十惡常隨善師等心哀衆無

能壞者世世見佛開士聞行堅持不忘守真
不諂常行至誠又譬如無結愛天所止觀第
光耀天上端正姝好是天第舍不自作不有
來作者本無所從來去亦無所至因緣所生
其人前世作德所致用布施衆生故得生彼
第舍中止賢者欲知佛身因緣所生用世人
欲見佛其人前世有功德遠離八惡處生慧
信於佛佛所以現身者欲度衆生故如山中
響不用一事二事有山有呼人有耳聽乃聞
佛本無形亦無所著因緣所生世世習行空
生死因緣佛悉曉之本無生死亦無滅度作
是示現作是說譬如幻師化作轉輪王慈化
潤衆聞者皆喜人索珍寶所愛被服悉恣與
之王在衆中坐起行步容儀安諦人有見者
莫不敬禮不以一事二事成有師有呪有聚

人隨所喜化現之有點者知爲化矣斯幻人
無所從來去亦無所至本空化所作點者知
因緣所由佛身亦然用衆事有功德有勸德
念群生使安隱具開士願分布經法教授使
行棄定思惟分別爲人說經使學諸天人民
莫不歡喜中有自貢高者不知慚者姪亂慳
貪者強梁自用者喜鬪不可諫者姪怒癡所
覆者行惡不可計者佛在衆中端正姝好坐
起行步法儀安諦衆惡已盡唯有諸德使人
得安亦自行佛事本空無著如幻師所作開
士見佛身如是雖爾不著無諸想念雖知本
空恭敬作禮供養無極徃古來今諸佛皆從
衆事各有緣生開士作是念守行者得佛疾
法來開士說佛身時四萬八千開士即解盡
信之行百億開士得無所罣礙問皆能報四

潛十

十六

百億開士得不退轉八百億開士皆得阿闍浮住法是時天持名華來雨散法來及諸開士上持法來威神都一佛界諸有音樂皆自作聲數千萬天從虛空中散天衣作音樂共樂法來及諸開士衣皆行列覆一佛界諸天燒雜香其香分散亦徧一佛界地悉震動開士普見諸佛諸佛皆遙歎法來言善哉善哉是時諸佛授普慈開士決後當作佛字罔摩迦祇陀頗羅耶如來無所著正真道最正覺諸女即化爲男世世所生不離諸佛常以大

明教授十方以次作佛佛告善業開士疾欲得作佛者索明度無極精進恭敬如普慈開士

囑累阿難品第三十

佛告阿難以明度無極經累汝諦持念了取

字句莫使缺減左右顧望此是無盡經藏鎮諸法悉從中出無量經卷種種異慧所見人民若干種所喜所行道經所入慧一切皆從是明度藏中出若干種所見相種種所行若干種根癡種慧種人民所求盡所求慧如來悉知從明度中出是經如來無所著正真道最正覺毋是慧眼并我身皆從是出生佛言阿難若敬我所說法爲敬事我若自敬身有慈孝於佛持是奉事明度悉爲供養諸佛已若身口心有慈孝於佛不言無孝若常得佛儀常如法心常淨無瑕穢若見佛不言不見如是悉爲報佛恩已我語若阿難是明度從中忘一句一字捨之不書若爲不孝於佛不見我不敬於佛爲無供養爲背佛恩佛言阿難汝諦受諦念明度用慈孝於佛故承用教

故此乃徃古來今佛天中天之所施教也用
是供養者汝於衆生爲大慈爲以親近持佛
藏佛滅度後汝當護是經莫令減少我手付
汝當授開士大士開士大士持是所致諸勤
苦生死牢獄悉破壞諸無智者爲癡所繫著
悉得放解諸邪官屬無不降伏諸所欲法悉
除去上佛坐作無上正真道人民無目者愚
癡者悉當開與正法第一大道無兩正法無
上正真道最正覺慧是爲明度決我滅度後
三千國土其中人民若悉教入法中悉令成
就得應儀道曰教示乃爾所入如是一劫若
百劫悉爲說經今得滅度雖爾尚不足爲承
事我不如持一句教開士爲具供養佛已佛
言我今於是稱譽若囑累明度至一劫百劫
不能竟麤辨說耳佛從袈裟中出臂舉右手

著阿難頭上摩頭又以著阿難肩上云何阿
難若慈於佛不阿難言佛天中天自當知之
如是至三佛復問云何若孝於佛不復三阿
難言佛天中天自當知之佛言若以弘慈報
佛恩備矣尊奉明法恭矣受經義句當令分
明心所念餘棄之一心於是中書具經正字
畫點句逗取時持時學時當諦授與開士今
經上下句逗相得書時好筆好素上當自歸
承事作禮供養華香擣香燒香澤香繒蓋幢
幡譬如天上所有潔淨香著麻油中好燈炷
自歸頭面著地却燃炷加敬作禮承事佛說
明度無極時在王舍雞山中衆弟子諸開士
中央坐佛年三十得佛十二月十五日過食
後說經畢諸弟子開士諸天質諒神龍鬼王
人民皆大歡喜前爲佛作禮而去

大明度無極經卷第六